

敬業堂詩集

函一

十

冊

敬業堂詩集卷四十六

海寧

查慎行

悔餘

夏課集

起丙申五月
盡十二月

長夏家居與德尹約為書課弟方纂輯北史余點
勘毛詩注疏中有疑義互相剖析此情不異曩時
所增者白髮耳

喜東亭弟滇歸見過

時德尹亦
歸故居

艱辛憐遠別歡喜報初歸
萬事付彈指一門多拂衣
侵晨移爾艇觸熱扣吾扉
相對成三老人間此會稀

自五月不雨至於六月二首

一月愁霖歎三旬亢旱憂
雲從火山出溪挾沸湯流
魚

鼈潛無所蝸蟾聒不休氣衰尤怕熱計日望新秋

有客京華至為言赤地同不成驅鬼魅兼恐致蝻蝥莫

瘞神何定精誠感或通仍聞漢廷議策免到三公

得雨

海色昏昏合雷聲隱隱鹿羣情希汜濩天意卹焦枯一

溉功雖細干林氣稍蘇篝車吾且祝不敢笑田夫

橘蠹化蜨

馬縞中華古今注謂蛺蝶一名野蛾生江南甘橘園中不知乃橘蠹所化也

橘蝨凡兩種食心與食葉食葉者速化勢如靈鬼攝

語出

關尹子

朝為蠕蠕蟲暮作栩栩蝶公然委其蛻雙翅巧開

合却向故枝頭飛飛繞三匝漆園方大夢與汝形相接

試問前後身依稀在目曉

立秋夜雨晨起納涼

飛雨灑然過小窗殘月明微風動秋意草木為先聲故
人何方來

樊川詩清風來故人

一笑披衣迎端能起我懶天地非

無情取用及須臾寸懷良已盈茲晨不雨且莫負鷄三
鳴

秋暑三絕句

秋暑不減三伏天杖藜隨我來谿邊跳蛙自得坎井樂
上有夕陽高柳蟬

學書遠遜王右軍學奕無過王積薪日長如年大好睡
小技何足勞吾神

布幔十幅當檐牙東南好風渾被遮床頭非無蚊遶髻
案上幸少蠅集爪

題毘陵徐思肖詩卷後四首

郵筒寄我一編詩天然神骨清而奇騷壇家將生有種
看取陣前姑蔑旗

宮體徐摛一變新傳家又得石麒麟年來咄咄欲跨竈

莫恠阿翁誇向人

戲用東坡尺牘中語

錢四才華世所稱乃郎筆力亦騫騰

謂同年錢綱庵父子

同鄉遂

有兩勁敵詩派今屬南蘭陵

狎主齊盟事不難竝驅應許八蹄攢老夫合退三舍避
憑軾試從僻上觀

七夕前二日同德尹濬安飲東亭齋二首

水淺菖蒲港船通皂莢橋爲歡須永日相過復今朝
草徑荒初闢桐陰薄漸凋歸休真上策何待蚤招要
同祖如同父爲兄忝伯兄家貧餘世業官滿得鄉評
齏醬調藜糝厨薑芼鼈羹向來疏酒盞一飽累經營

秋庭

秋來無一事物態頗相撩是葉須防蝕無根不耐澆
欹花危露蒂修蔓妥風條滿目皆生意吾庭未寂寥

賦得雨中荷葉終不溼六韻

爾本池中物翻從溼得乾出泥莖濯濯帶雨葉團團散
作千聲去歇留一滴難高低承翠蓋大小走珠槃灑脫

蕪湖詩話卷四
三
渾無跡陰晴詎改觀肯同凡草木漏澤妄思干

雨後行田

水氣一村蛙晨光幾點鴉畦風涼病骨衣露涉秋花正
爾關農事兼之遠俗諱桔槔閒挂壁勞苦及東家

寄吳少融二十六韻

時吳宰壽光

忽忽三年別遙遙異地情索居雖潦倒結念每迴縈憶
昨同晨夕惟君獨老成吉人辭樸訥端士意肫誠踴步
寧愁失冲懷敢自盈授經依北郭請業到西清榻愧陳
蕃設詩容顧况評出攜青鏤管歸傍短燈檠績學承名
父高才敵令兄少融為梅村先生幼子西齋給諫愛弟向來留著作兩度
費咨呈自我辭書局憑誰問客旌九衢千轍軌万事一

碁枰他日乘軒鶴當時出谷鶯先鞭輸祖逖上第失楊
英夜雨新豐市秋風古灌城得官隨本分爲政且神明
側聽衣冠誦如傳襦袴聲科條煩是累民社寄非輕示
俗因奢儉調絃戒改更免教同列忌休矯一時名此外
佳眠食其他簡送迎陳編閒肯廢古道力能撐便欲觀
風去殊難抱病行撫躬憂浩蕩回首歲崢嶸爲報鳴琴
宰應憐撤瑟生西河餘痛在雙眼不曾盲

八月初四日放舟至硤石

習嬾常支戶乘涼偶放船渠清瓜蔓水露白稻花天夜
氣鳴雞後晴光蕩槩前地平先見塢高出万家煙

西阡桂六韻

手種西阡桂三年漸看長玉蘭輸舊翠金粟試新黃露
重朝流潤牆低遠遞香婆娑佳月色報畲好秋光敢擬
栽爲柱差堪署作堂丁寧松檜伴稍待共成行

南堂桂八韻

五桂階庭樹迎秋候蚤催著花多四出得氣必齊開自
我先人植仍資造化培好風香世界涼影月樓臺天上
逃斤斧山中混草萊在家僧偶聚不速客頻來時衍齋
東亭不
會期而豆莢瓜瓢味兄酬弟勸盃最宜星露下永夕與徘徊

偕季方東亭德尹曾三諸兄弟過東林庵

北郭吟筇罷東林講席收

憶四十年前陪范
文白先生來遊事

能無三宿

戀復作五人遊攢掃庭常潔牋題壁尚留影前香一瓣

來往記風流時坐旋法
師影堂

題周少谷杏林雙鹿圖為老友徐韓奕壽

杏為仙人林鹿是仙人友少谷寫此圖卷舒落吾手愛
其粉墨久若新畫义挂壁濃香熏朝來詩成畫亦往持
以贈君兼壽君與君論交從壯盛通介看成徐邈聖我
如麋鹿爾為羣豐草長林同此性

臨平舟中

作雙白鷺起前汀西望山光的的青暗數永和隄畔路
宋趙諠父過臨平詩
居人猶號永和隄一橋十里似長亭

虎林與同年許莘埜話舊時初自蜀歸四首

烹鮮滋味定如何叱馭行經萬里餘今日秋風吹櫂轉
江鄉原不少鱸魚

冷曹需次問何司剩許閒編楚道詩五角六張成底事
人間吉日是歸期

旗鼓相當膽氣麤生平事事不曾輸輸他對我誇年少
漆點烏絲一尺須

同年難得况同鄉久別重逢感歎長百五十人餘幾在

勸君狂得且須狂年時連聞劉大山陳巨高李時夏三同
凶問狂得且須狂借用香山成句

題安平泉上二首

自從兩乳垂天目中有神龍不測淵直到臨平山脉斷
尚溇一眼在山泉

我讀咸淳潛守志曾收元祐罪人詩摩挲一片竹間石

好事僧稀問向誰南宋潛說友咸淳臨安志云仁和縣安隱院地產曲竹竹間有池名安平

泉東坡題詩云云按東坡題安平泉七律一首集中失載余曾采入補遺卷中今至泉旁尋碑碣不得故云

曾濟蒼遠致秋蘭一本重陽前試花寄詩報之

廣文能好事貽我婺州蘭不共三春賞翻從九日看同

心如爾少獨立後時難待作幽人佩清香可耐寒

世棄

世棄身何與身閒分已過讀書新得少見夢故人多黍

熟來初釀池荒足敗荷東籬佳節近不醉擬如何

吳起君重陽送菊至

今歲寒氣蚤應節微有霜是日霜降節開門得君書遠致籬

下黃瓦盆三十本羅列成重行端如衆君子正色登我
堂吾衰萬事慵酌酒不盡觴何以畚佳貺託詩紀重陽
後三日邀諸兄弟賞菊席上放歌

吾鄙吳生字起君知余雅好忘余貧扁舟送菊乃無酒
正及九九清霜辰招呼近從南北巷假借半出東西隣
後庚三日稍稍集義取兄弟不及賓有如田家大作社
杖白頭者凡七人合年四百七十二雁雁排翅魚排鱗
天公貺我美風日歲云莫矣行食新海蝦挾須白出縮
椀蟹負殼紅輪困木瓢木杓傳父祖中貯兼味清而醇
興來大壯客顏色詩好全得花精神人間所歷皆夢境
至樂孰與田園真勿辭醉插滿頭去一笑正落陶家中

少睡

秋去寒猶薄冬來夜總長
堦前黃葉滿門外朔風狂
舊得休心法新傳養目方
癡兒憐少睡檢曆勸移床

秃筆吟二首

久被宣城束縛加鐵梳膠綴
老年華耗磨毛遂囊中穎
零落江淹夢裏花縱不封侯
追定遠誰能銘冢向長沙
畫工掃壁休嫌秃會見騏驎
出咄嗟

書不中書觚不觚也曾東抹
與西塗姜牙斂手輸雞距
虎僕藏鋒讓鼠須墨沼涸逃
蓬館債硯田荒貸管城租
免冠一博秦皇笑差勝中山
穴處徒

問東亭病

天末清貧更身還病亦隨用巫真下策勿藥得中醫出語

漢書藝文志瘡霧侵肌重冰霜造物慈入冬思合醪為爾尚

遲遲毛詩箋入必共族中而居又有祭脯合醪之歡

隙光

隙光野馬去如馳正是先生靜坐時病不求醫吾有命

老方學易世無師回思少作雕蟲比轉悔餘波綺麗為

喚起景陽來入夢擲將殘錦乞去聲丘遲

芝田長子字西山賢而有文游學京師一病不

起旅櫬還家詩以當哭兼慰芝田

天心洵茫昧家運關彼此可憐兩長男相繼俱客死兒亡

歸柩去冬亦於十一月到家倚閭冰霰後歸櫬風霜裏割愛難以慈

奪情莫若理明明聖賢教五十不致毀父母恩且然矧
乃施於子吾本同痛者勸君兼自慰知其無奈何安命
而已矣

冬課吟效擊壤體二首

炳燭餘光已可知假饒聞道敢云遲故人問我三冬課

六十年前上學時

順治丙申余
七歲方就傅

畫前有易易如何刪後無詩詩倍多更向誰邊討消息
水從冰後不生波

棄裘

禦冬年已久毛禿僅皮存等是犬羊羶永辭狐貉溫留
之竟安用棄爾似無恩改作吾何望茅檐去負暄

長至

天地有肅殺微霜爲驅除洎乎冰雪交慘者旋以舒來
復子之半始凝履之初何須當既剝然後觀盈虛

望歲集

起丁酉正月盡九月

三年來元日連遇風雪歲事不登生理日窘朝來
天色晴霽農占其有秋乎老圃望歲殆同老農也

元旦喜晴

一從朝請廢冰雪博高眠却展山中曆重瞻霽後天兒
孫粗識字兄弟繼歸田此外非吾分隨人望有年

邑侯陳衡山壽十二韻

海角桑麻邑沙灣舄鹵田極知吾土瘠端賴令君賢侯

到纔期月民勞已有年上官頻按部下戶忍施鞭利器
無盤錯長才展事權緩征舒積困雇役免齊編酌劑心
良苦橋虔弊悉捐政成單父速名媿太丘傳麗澤三春
渥仁風百里宣初辰花照座佳氣柳含煙里老霞觴後
村童篠馬前也應容野史來奏雅琴篇

正月十八日偕德尹西阡看梅兼邀曾三芝田
東洲諸弟同飲花下三首

西麓寒梅樹年年二月開今年開獨早應爲兩人來
已是四回看憐渠閱歲寒同時手栽者松柏長偏難
隨意致芳鄰壺餐勝觥飯尊前一校點且喜人皆健
及門樓敬思自粵西遠寄溥桂

隔年一信到何遲寄我潯州菌桂皮已向籠中儲上藥
只愁天下少良醫情深遠荷門生致性在終於野老宜
別與蘇家傳釀法搗香篩辣味尤奇

贈杖

倚賴支離叟扶持拙病翁長虞故步失不爲暮途窮世
乏三年艾家無五尺童用行吾與爾形影畧相同

補屋海棠萎而復甦偕德尹芝田作用黃山谷

骨體

前年爛若雲錦堆去年憔悴無花開今年芳意莽復回
人情貪多似嫌少却是花稀看愈好閱汝盛衰成我老
白頭自白紅顏紅花如有語解勸翁夜闌莫放清尊空

再次芝田韻一首

隔霧看花三老翁未甘白髮負春工一梢欲墮胭脂雪
幾朶猶含蓓蕾風爛熳人情沉醉後寂寥詩味卷帷中
相逢莫漫嗟遲暮悟徹從知色是空

原詩有相逢可惜已遲暮之句故結

云句

聞副相揆公正月初六訃音小詩寄哀四首

宮內稱才子臺端倚重臣得君時最早歷試品尤真
嗜苦餘千卷門閒少雜賓不知經幾劫還復有斯人

卿月三臺墮文星八座懸望高虛相業才大損天年謝
客終成佛

生平留
內典

王喬竟得仙所傷江鮑體無子孰流

傳

憶昨歸田後情親分不移爲憐吾已老長恐見無期急
遞書頻達因風報輒隨半年遲作答魂夢至今疑
何當承遠訃豈是誤傳聞四海誰知已餘生又哭君有
文披舊橐無酒醅新墳不朽將安託從今硯擬焚

牆角郁李花盛放

碎霞剪綺綴繁枝

陸魯望郁李花賦
碎細綺剪明霞

偏反阿儺自一時

春到軒庭無悴物又收常棣入吾詩

連朝風雨園庭海棠零落都盡而瓶中折枝娟
然獨秀老夫欲不誇爲佛力其可得乎

兩株芳樹全搖落泥汙臙脂亦可憐值得拈華成一笑
風災不到四禪天

芥舟二首次祝尚于原韻

蜃樓鮫屋總非真愛爾虛舟遠俗塵芥納須彌中有地
杯浮滄海四無鄰琉璃貯篋團團鏡綫毯鋪筵寸寸茵
容得兩三人坐否故應魚鳥自相親

水滿均堂柳拂梢不須結宇用香茅觸蠻有國爭蝸角
燕雀何心占鷺巢茶竈筆床人共遠蔣牙菰葉影相交
未能便作浮家去倘許門從月下敲

三月三日雨中潘竹村祝尚于周楚和三老人
偕赴德尹之招翁源姪不至席上口占寄嘲

又是重三被禊期招尋也復逐羣嬉地偏俗儉人多壽
歲美風和雨應時木芍藥花開正好野醪醑酒醉何辭

竹林一阮真疎放不豫吾流太好奇

重宿寒中書齋

桐又將花柳又綿山齋一榻故依然曾偕老友成三宿
却話前遊過十年白髮昏昏中酒味青燈黯黯讀書緣
只憂海近沙頽岸夜半潮聲撼客眠

丙戌秋與竹垞連榻齋中能無存歿

感之

制府滿鳧山同年奉 詔巡海道經吾里詩以

迎之四首

十年翠蓋不南巡千里巖疆寄重臣看取隨身三五騎
肯教供億累州民

水滙山陬被澤深兩邦旌節喜重臨每逢田叟停車語

徧示 君王愛養心

畚鍤千家傍海墾崩沙日費水衡錢福星昨夜臨吳分
斥鹵重開負郭田

雲帆星島駛經過海外風恬可有波一事尚煩公入告
兩關歲課本無多

春盡日雨中招諸兄弟爲櫻筍會

老去邀歡要及时肯緣泥濘阻前期舊年風雨正如此
今日陰晴昨豈知入饌朱櫻貪摘蚤翻堦紅藥笑開遲
兄酬弟勸更番事但到尊前醉勿疑

德尹於得樹樓後築屋三楹既成以詩落之

五架三間屋千竿万个園竹深堪障日樹老莫傷根北

牖斜穿沼南榮短界垣景難兼奧曠意在適涼溫粗遣
規模具翻嫌布置繁移書驅僻蟲品石斥湖黿雞柵寬
蝼螳牛宮祝子孫誰爲張老頌聊托仲長言
謝康樂山居賦仲長
願言流水高山幸爾留閒地容余補壞樊一菴何日就笑指畫
圖存

偶過鴛湖

村北村南綠滿陂溪山百里放船宜鳩鳴甚熟蠶三起
燕掠風梢麥兩岐乍煖故知非雨候薄遊何必定花時
兩湖地主今誰在每到徒增感舊詩

與靈上人餉龍井雨前茶二首

風篁十里郎當嶺官焙爭收粟粒芽慙愧老僧親手摘

青紗蠟紙餉山家

今年穀雨雨廉纖茶味全勝笋蕨甜正自不嫌山少肉
肉山無此好毛尖

老友鄭寒村歿後五年其子義門攜愛蓮畫像

過余屬題得二絕句

自脫朝衫換幅巾祇應營道想前身翛然出處行藏外

誰識完人是半人

寒村晚年病風能以左手作書畫自號半人

更有何人識雅懷一琴橫膝對花開多慙後死黃山谷
曾見光風霽月來

梅雨

半月濛濛雨千畦釋釋耕麥租雖未入米價漸將平屋

老礎長潤庭虛苔任生吾脾方畏溼却立候新晴

德尹第四子滿月詩當祝辭

多男孰云累晚境人尤羨薛鳳乃踰三荀龍剛得半家
門增喜氣當暑清風扇膩髮搓成團貫之五色線耿耿
垂大耳皎皎開方面出左傳注騰上所未知豐下已可見我
來拊汝頂爲汝祝初旦一祝兒長成再祝爺強健三祝
好弟兄他年相友善

秋灾行

西流之火方蟲蟲兼旬不雨亦不風先庚後庚凡五伏
秋暑酷於六月中河流旱乾田拆罅誰遣天吳來潤下
淡塘灌注味作鹹仍恐良苗變枯稼天乎降割此一方

相怨勿謂民無良神疴鬼瘡何處避且死那復論流亡
老夫本病在腰腹不受淫邪外來觸只餘雙耳未全聾
忍聽村鄰百家哭

盆中草花二種已含蕊矣朝來忽萎

霜後冬收子春來雨發芽關心經夏旱滿眼望秋花忍
負栽培力徒勞灌溉加童烏苗不秀能免于雲嗟

中秋夜與德尹對酌

今夕是何夕弟兄俱在家狂吞杯底月笑指霧中花老
子興不淺達人生有涯底須愁後夜圓影蝕蝦蟇

十六夜復與德尹小飲弟有詩次其韻

既望猶未望今年異往年連宵雖博醉老景劇相憐但

有兒搖膝何須客滿筵好詩能賽月脫口自清圓

秋花

雨後秋花到眼明閒中扶杖繞階行畫工那識天然趣
傳粉調朱事寫生

五雜組九首

五雜組玄黃帛往復還牛馬跡不得已主避客

五雜組新嫁孀往復還遊冶郎不得已時世粧

五雜組雙鷓鴣往復還兩蛺蝶不得已君棄妾

五雜組刺繡手往復還貝錦口不得已掩耳走

五雜組蠻貊餽往復還井輓轡不得已歸來乎

五雜組羅浮雀往復還華表鶴不得已生處樂

五雜組青紫檀往復還新舊券不得已錢神論
五雜組蝶戀花往復還蜂趨衙不得已東西家
五雜組采染綃往復還燕覓巢不得已思故交

古詩四章

天荒地亦老變化蕃草木自從開闢來悅人以紅綠有
榮斯有瘁坐覺流轉速傳語好風光寧能銜無目

衆虬國大槐擾擾成侯王莊周化蝴蝶與物亦未忘至
人豈無夢夢則超形相蟲螳所不爭是曰華胥鄉

域內有名山攀躋力可至人皆造其麓抑或半嶺廢歸
來述所見彼此不相似等是未登峰毋爲笑平地

徒歌易成謠獨唱難爲喁我琴誰我瑟我鼓誰我鐘知

音苟弗存奚取覲面逢遙遙千載下或有牙與鍾

敬業堂詩集卷四十六

敬業堂詩集卷四十七

海寧

查慎行

悔餘

粵游集上

起丁酉十月
盡十二月

丁酉夏同年有自都下來者傳佟陶菴中丞意遲
余作粵東之遊背秋涉冬畏寒擬不出矣余弟查
浦曾三至其地間語余曰嶺南無霜雪且兄生平
游蹤所未到盍一往焉遂於十月初俶裝明年四
月由粵西旋里往反幾二百日檢點道中詩約如
其數分上下兩卷錄存之

將有嶺南之行雨中過龔蘅圃侍御田居話別
小別脩三載相望渺參辰舊交半在亾邂逅得兩人喜

汝罷官後田居傍城闔我來叩門入迨此風雨晨問我
將奚之有懷難具陳白頭萬里役正坐不耐貧頽年知
幾何復爾聚散頻篋中有佳句在遠情彌親

時侍御以
田居詩藁

屬餘
作序

早發富陽喜晴

午辭樟亭驛夕抵富陽宿霜日曉初晴烟江寒更綠雞
鳴茅宇近鴈下潮田熟萬株楓柏林散作錦繡谷平生
山水興臨老猶未足聊復紀初程清吟待茲續

桐廬

山偏不可城千家聚成邑民居半商賈仰取俯有拾斬
爨起炭烟割林收漆汁托身覆載內生理隨分給壯年

不早計暮齒行已及莫怪杜陵翁茫茫百憂集

念兒作釣臺詩未識嚴先生不受官之故徒以

高隱目之作一首以廣其意

武宣馭下如東涇課職東京亦孔棘

語見後漢書二
十八將傳論

一官

直欲臣故人此意先生應早識逃名事偶同高尚避辱
心孤轉深匿羊裘一領却累渠苦被劾求相物色伏波
謗生薏苡珠侯霸得罪由司徒客星非將亦非相吏議
可得加狂奴君不見璜谿老叟不自重出應于敗後車
夢萬古江湖兩釣竿潛龍勿用鷹揚用

三衢道中口號四首

水落灘尤窄輕舟一葦容機心與機事那免怨機春

沙際集飢鷺修翎冷自梳
孟嘗門下客大半食無魚
兩岸丹黃色千家橘柚林
勿嗤奴價賤顆顆鑄成金

明日川程盡聊為半日停
多煩賢太守為我致輿丁

謂

培之
太守

早發常山大霧

苦霧忽吞天去城不數武
如行襄城野七聖迷處所
初旭漸漸高寒光翳復吐
窅然墜醉夢既覺乃停午
前瞻懷玉峯峯峯垂白縷
西江行在望未濟恐多沮

舟發玉山

高灘稠竹節尺水浮瓜皮
前經彈子渦膠淺時有之路
長景苦短坐送西南馳却憶
前年歸正當暴漲時一程

破三日上水宜遲遲不謂下水船艱難亦如斯人生順
逆境閱世老更悲

重過貴溪與同年王辰幟明府

我昨停舟爾下車三年重到勝當初冬來天氣晴尤美

畫裏江山錦弗如官况不離文字外

時分校鄉闈頗稱得士

風謠

閒續笑談餘象山亦是先賢蹟好並鵝湖入志書

鉛山施明

府重修鵝湖書院屬余編輯志書
貴溪管內舊有象山書院故及之

龍津阻雪

地少雲多處風饕雪虐時客程當歲晏天意警年衰輕
出自成悔遄歸更勿疑平生多類此既往可勝追

雪後渡彭蠡

雪山四望開彭蠡豬其中天光落東北寒氣青濛濛獨
往矯孤鶩羣飛駕高鴻沙明洲淑出葉潰枝顛空此行
向南州聊慰離別悰三年女憶父千里兒隨翁生涯豈
無涯作計誠匆匆寄謝宮亭神歸帆幸分風遠遊興欲
盡一咲非途窮

南昌遇袁州太守葛賓廬二首

懷抱因君又一開人間洵有出羣才勿輕僻左宜春郡
曾屈昌黎作守來

南浦維舟不記巡眼前冠蓋一時新也知諸葛真名士
來與貧交作主人

南昌旅次荅吉水令湯納時表弟見懷之作四首

與君稱中表同是庚寅生以我半年長白頭忝為兄
竭來寂寞遊奈此離索情相望四百里一水空盈盈

隨身乏長物投贈殊寥寥子貧乃過我報以雲藍牋
嗔成十四章字字珠琲圓稍增行笈重笑擲看囊錢

世降士不情矯廉競稱高萬鍾避蓋祿半李分齏糟
達者殊不然寓形隨所遭時無謝仁祖菜把恩亦叨

同里兩湯生一登青雲梯謂西厓少宰一滯百僚底
長恐簿

領迷烹魚漑釜鬻好音良可懷逝將掃吾軌歲晚期汝
偕

雨中早發南昌留別李壻暘谷

把酒對西山開船湖南浦數聲城上櫟幾點沙頭雨依

回骨月恩戚若去吾土老人情懷惡含語不得吐官罷
有孤蹤路難無定主勿愁魚化鐵且作鴻遵渚朗咏白
絲行行行忍羈旅

豐城縣北十里磯頭山上有曲江祠朱文公往
還湖南時與李後湖姚雪山遊此後人因奉粟
主以祀三賢詳見李崆峒祠記中今以韋武陽
易後湖者訛也

贛江西南來天矯北走龍到此乃東折磯頭扼其衝是
名曰曲江形勢險且雄扁舟清夜詠倡自紫陽翁同時
李與姚杖履偕遊從三賢列祀典蔚為名教宗世俗不
好古變置靡所畏作詩糾繆誤兼以警盲聾

樟樹鎮

舊名清江鎮

瀟灘流下櫂歌聲一曲清江見底清老樹不知生意盡
尚憑古社占村名

泥溪口枕上聞雁

陽鳥踰彭蠡飄飄尚南飛晨光若前薰羣起泥江濬數
聲枕上過傾耳漸入微彼非我同羣安得相追隨我帆
十二幅取用常半之何以不用全波濤怕欹危下有無
底寶笏有不測磯身乏雙羽翰爭先復奚爲汝往太急
急吾行故遲遲茲遊到嶺南諒亦難久羈歸時倘見待
入春以爲期

峽江縣

舊日周瑜埭今為小縣城踞高因峽勢隨地改江名潦
縮漁添戶時清戍減兵大都從此去彷彿蜀中行

雨中望玉笥山

水遠山平四百里兩崖斗拔滄江起舟人遙指三三峯
名山記玉笥有三十三峯亂插芙蓉雨新洗仙家縹緲住仙壇不道
人間路大難請看玉笥山南路漸近西江十八灘

過桐江口不及訪同年李培園侍御以詩代柬

念昨別京華君方入臺端操持紀綱地正色不可干如
何神武門亦挂惠文冠早知世路隘不及山中寬自聞
返谷村松竹為改觀築亭名補過於義恐未安古來賢
達流要視進退間我欲賦頌人為君歌考槃勗哉承世

澤名節初終完

螺山文丞相祠

千古興亡恨忠臣末運多死難扶少帝生不愧魏科慷
慨憂時策崢嶸正氣歌黃冠故鄉意廟貌在山阿

青原淨居寺七祖道場

錫泉一派接雷泉味是曹溪六祖禪欲識廬陵米貴賤
憑師問取下江船

白沙渡

兩岸沙痕疑雪一村竹氣如煙風竿獵獵酒旆雨笠遙
遙渡船

泰和城外望快閣

西昌漢古邑地勢實開拓鏡光十里平倒影見城郭浮
圖南北峙雙秀拱一閣緬彼白下宰流風宛如昨官清
無俗情景勝擅傑作冰絃絕已久人境兩寂莫除却謝
元暉澄江何處著

澄江一道月明山谷登快閣詩中句也世以比元暉澄江淨如練云

十八灘絕句并序

按志自贛縣至萬安中有三百灘孟襄陽所謂贛石三百里是也然陳書云贛水本二十四灘武帝發虔州水暴漲高數丈三百里巨石皆沒止存十八灘耳世稱十八灘者當本此明嘉靖朝湛甘泉自南司馬告歸過此作十八歎今得詩亦如之各取灘名中一字為韻非云相襲亦勞者自言其情

而已

習坎險在前何人不惶恐到此退已難應思急流勇

右惶恐灘

巨石浮牛背亭亭鷺足翹入鷗羣不亂愛汝好風標

右標神灘

連日遇石郵溯洄良苦辛滔滔天下是不問久知津

右綿津灘

舟人買紙錢例拜灘頭廟來朝風順逆今夕誰能料

右大料灘

後灘接前灘川脉互縈繞人間爪牙毒為害長在小

右小料灘

問言洵有神受命若酬酢借取方便風泥行免郭索

右武索灘

侵曉上曉灘我睡不覺曉向來坐有心憂患亦不少

右曉灘

萬里黃河水崑崙乃發源贛江源漸近應號小崑崙

右崑崙灘

虔吉此分疆灘聲一倍長人家盡柴步墟落半漁梁

右梁灘

雪少偏多雨朝昏水氣腥青洲洲畔草臘月已青青

右青洲灘

疆礫相摩盪驚濤盡日喧直同雷奮地不獨雨翻盆

右銅盆灘

大波深爲淵小波淺成瀨安得并州刀剪此青羅帶

右落瀨灘

長年生狎水豈有不龜藥幸自少層冰可憐多赤脚

右狗脚灘

莊生工寓言率以小况大必若魏王壺人間能幾箇

右大壺灘

失勢落江湖中流賴一壺千金奚翅直人有不貲軀

右小壺灘

劍戟礪鋒鋌森森兩旁吐狂瀾障不得爲欠中流柱

右天柱灘

石欲截江斷江流奮怒前來如弓挽強去若箭釋弦

右橫弦灘

用盡灘師力今朝過鰲灘我無牛酒犒愧爾報平安

右鰲灘

自贛州換船至南安

八境圖中路西來五換船鄉心同北望客况異南遷

東坡

南遷時作虔州八境圖詩

秀嶺標雙堦清流穩一川好風三百里計

日指蠻天

過南安傷陳六謙太守

太息南安守居官僅二年如何平丈氣竟掩九重泉
宦業孤孫盡書名一郡傳經過少交舊回首極淒然

與大庾令李阜如同年

同年四開府百里獨棲鸞邑是衝煩邑官仍本分官

李舊

宰新城

別來顏各換此去歲將闌珍重留行意猶餘舊眼

看

度梅嶺題雲封寺壁

閱盡波濤險阻途頓教磽确失崎嶇梅花遂裏三關戍
錫杖泉邊六祖孟過客儘貪風日好居僧曾遇雪霜無
他生行脚緣猶在又入騎驢度嶺圖

衣鉢亭

夜半傳來消息真本無明鏡自無塵問渠衣鉢留何用

猶有焚衣毀鉢人

明魏莊渠事

發南雄凌江方涸舟行一日纔十許里排悶成
歌

凌江歸壑當深冬城隅纔可溝洫通麤砂細石單槽中
直與船背相磨礮船頭纖纖船尾大舵師束手輪篙工
篙工作力如羆熊腰身寸寸彎彊弓蝨行禪縫蟻旋封
跛羊登山鷓遇風人間癡鈍有若此歲聿云暮愁衰翁
愁衰翁翁行作歌歌未終羊城尚隔千里外一夜夢逐
南征蓬

偶閱楊誠齋南海集途中多賦桃花且有梅花
應恨我來遲之句余度嶺正值梅放時戲效其
體作一絕

我來時候異誠齋不見桃花只見梅博得口占詩一句
千枝齊向臘前開

晚過始興江口再效誠齋體二首

始興江口水平川從此通流到海邊我是漁船釣竿手

又攜簑笠上樓船

昨喚吉安漁船至潁今所坐乃廣州樓船之名見漢書今仍此名

不必皆官舫也

一重山轉一重灣不出孤帆向背間行過前灣試東望
夕陽多在隔溪山

冬暖

榕葉交陰筍出窠南中冬律似春和敝裘韞在猶嫌厚
老研冰消可待呵蚊到宵來飛不少蠅於秋後集還多

所嗟無補桑榆暖奈此霜髯雪鬢何

望韶石二首

西瞻蒼梧雲北望洞庭野浮光表霍闕古樂傳奏雅
聖主不南巡羣峯赤如頰魚龍久寂莫孰是聞韶者
好風自南來吹彼松竹林鏗然中音會中有太古心典
樂者誰歟簫韶此遺音虞廷去我遠俯仰成古今

韶州風度樓

公進千秋錄開元極盛時知幾同列少去國一身遲終
始全臣節安危動主思高樓瞻画像風度儼須眉

雨發韶州

蒲帆十幅去不停波光瑟瑟烟冥冥芙蓉驛南一回首

三十六峯雲外青

虎頭磯歌

在太平關南十五里

亂山少肉谿乏泉渴虎下飲清泠川
飢蛟掉尾不得取化而為石形模全
白章黃質毛斑斑四蹠陷沙行不前
尻雕起伏脊蜿蜒當頭一眼射的圓
北平將軍身未到沒石飲羽誰所穿
眈眈下視流饞涎坐踞要津凡幾年
國家封域拓海壖山珍水錯來無邊
賈胡萬里逐貿遷到此躡躅羸豕然
畏虎欲避無由緣我思走章牋碧天
霹靂暫借雷公鞭仍驅爾輩入山去
毋令為害于商船

十二月廿一日雪

我作冬暖詩蚊蠅憎瑣屑天公似解嘲
半夜風挾雪舟

人報奇事起掃一蓬白客子亦欣然千岑無寸碧梅花
落已盡春事蚤狼籍長恐百卉腓陽機畢漏洩却將粟
烈氣掣歛使凝結乃知朝來寒特為莢李設豈無雷雨
候候至方甲拆留取道旁春明年作佳節

彈子磯阻風

曲江入海流一縷縈驚蛇中逢彈子梗格鬪逞角牙狂
飈鼓狂瀾噴石作雪花扁郎好身手過此不敢誇筮易
遇涉川利用需于沙南遊本無事汲汲奚爲耶但使蹤
心平何憂前路賒止時吾泊宅行處吾浮家

觀音巖

石縫何年裂中央架小龕老僧如燕子乞食語呢喃

英德道中雪霽

輕冰結沮洳飛霰集阜岡
樽桑東南枝炯炯呈初陽
地暖劇流濕天空淡浮光
英山碧差差英江綠泱泱
不知夜來雪疑是朝來霜

英山二首

曾從畫法見磬頭董巨餘
蹤此地留漸入西南如瞰
蔗英州山又勝韶州

一拳一角總峯巒可惜天
教落百蠻好事吳兒渾未
識買園只鑿石公山

舟中即目

屋角菜花黃映籬橋邊柳
色綠搖絲分明寒食江南
路

賸欠桃花三兩枝

順風挂帆連下湏陽香爐清遠三峽

巴東三月昔聽愁嶠南三峽今則不北風晨發涇浦縣

英德舊名涇浦

吹我桂檝沙棠舟峽中之山阻且修峽中之水

平不流湏陽畫屏地底拔大廟紫煙天際浮就中清遠

更秀出造化有意窮雕鏤青菡萏花萼競吐綠玻璃鏡

奩初收華陽道冠簪碧玉竺國寶髻垂珠旒仙人笙鶴

雲渺渺帝子環珮風颼颼漸行漸遠似相送一重一掩

如相留片帆飛渡二百里又見孤墪迎船頭天憐此老

太岑寂貺以奇景須詩酬人間夷險非境造自我發興

成清幽君不見東坡先生海南向平生奇絕誇茲遊

清遠峽飛來寺

兩崖勢欲合中被江流穿上有佛者廬飛來自龍眠

梁晉

通中事詳載寺記中

神人所施設是物無頑堅想當初闢初風雨

驅神鞭鑿開渾沌竅巧貯聰明泉僧房若蜂房一一皆

倒懸爾來幾閱世不計草木年磐石具生機長根外包

纏波濤潤其趾日月行其顛散為松柏香聚作梅檀烟

菽蔚東西景軒豁子午天呼猿洞名在半空日暮躋無緣

清寒難久住仍放出峽船

胥口村

玉鏡臺何處江形就海低

地有玉鏡臺相傳安期故蹟

地平山斷續

潮滿岸東西生理漁樵足人家竹樹齊天涯各風俗孤

客自淒迷

白塢岡浮石

萬古江心石回江使倒流潮頭爭出沒山骨判沉浮按志

白塔岡在三水縣東南臨水水中有石浮沉各一鷺鴨寒來集黿鼉夜出游漁

翁牽小艇故故傍沙頭

沙口待潮

艇子膠沙觜坳堂等置杯何須愁日暮會有夜潮來

初至廣州與大中丞佟陶菴同年話舊六首

五年一別隔蓬萊芳訊遙傳庾嶺梅天上故人開府出

田間野老輟畊來山高海濶梯航路武達文通將相才

竊喜小詩言果驗濟時餘力正恢恢余出都時留別詩云君才畢竟為時

用故落
句及之

雙闕浮光氣象新

雙闕浮光照短亭東
坡題盡善亭句也

天教八座代

南巡誰能地望兼
門望君本親臣
又世臣行處風霜成
化雨坐看冰雪變
陽春眼前袞袞皆
時彥可有同心共
事人

端倪軒豁得奇觀
浴日亭邊眼界寬
兩袖有風驅瘴癘
百蠻無警靜波瀾
封疆自昔雄茲土
科目人今重此官
見說密章時入奏
葵心何處不輸丹

恩深自覺心逾小
才大何妨氣獨豪
節鉞威名行地遠
文章壇坫比官高
中郎題字推黃絹
太白分光屬彩毫
莫咲將貽無俗物
一條冰是舊同曹

時以耿緝
湖筆奉贈

詞人例作嶺南遊自嘆蹉跎到白頭浪跡又看成萬里
著書何敢望千秋誰為善相肥嫌瘦世有知音唱或酬
輸爾滕王高閣句一時唵徧十三州

中丞過南昌有試上滕王高閣望章

江門外有清流之句為西江傳誦

敢將孤鶴齒羣鴻性癖終難與俗同天下迂儒猶賸我
平生知己孰逾公會陪供奉雲霄上每憶交親氣槩中
今日相逢重戴笠下車還見古人風

寓居仙湖街庭桂盛放

客居澹無事庭下獨徘徊忽有微風度香從何處來家
童走相報檐角桂花開想到窳軒外此時方試梅

除夕

去國八十日計程逾六千長虞行不到到此及殘年無

復聞銅臭

此間不用錢故戲及山谷語

惟應烹海鮮蛤蜊與均醬隨

分佐拌筵

謝中丞餉節物

節物煩分餉殷殷地主情雖云施不報肯使受無名七

筋沾皆足庖厨愧已盈似憐藜苳腹曾飽大官羹

向在內廷

歲除例賜羊鹿雉兔魚酒

敬業堂詩集卷四十七

敬業堂詩集卷四十八

海寧 查慎行 悔餘

粵游集下

起戊戌正月盡四月

羊城元日試筆戲呈中丞公

風光六十九回新老客殊方愧此身
殘臘雪消正月暖
閏年曆報兩頭春
滄溟出日長先旦
斗極移杓又指寅
聽說官清民樂業
便思長作嶺南人

二日中丞招遊署後園池分賦六首

昨枉嚴公駕今逢袁紹杯
到來凡五日相見已三回
禮豈為吾設花應待客開
小莪何太早紅雨點蒼苔
北闢逶迤徑東連宛轉城
越臺當戶秀天井入池清倚

檻堪垂釣聞歌想濯纓向來瀟灑意只視此官輕
老樹何人種名園此地無自多新氣色無改舊規模曳
杖馴麕子看松長鶴雛恍疑蓬島近不似在城隅
勝踐烟霞外春風步屨初餘恩沾草木得性狎禽魚巖
壑真同趣亭臺画不如板輿迎養便未許賦閒居
竹密晴疑雨林深暖亦寒不知官閣好但覺旅懷寬蠻
果充枲飮江鮮佐食單平生滋味薄相對勉加餐
此外無賓客應憐老病翁交原因臭味賞亦到兒童
念侍行憂樂論先後行藏感異同却將詩送日良晤詎匆
匆

過前輩梁藥亭故居

風流雲散兩茫然轉瞬前遊十五年

癸未春余入館先生散館

獨客

遠來朋舊少貧官沒後子孫賢買鄰古有千金語遺橐

今為萬口傳話到五交宜廣絕西華葛帔復誰憐

立春日張梅麓前輩招飲雲麓堂

仙冀五葉撰良辰畫繡還鄉恰及春海內久推黃髮老

堂中猶侍白頭親金花彩勝隨年換銀燭華燈照座新

今夕從君論出處始知天地有完人

時張以養親告歸

喜晤藍公漪

藉甚榕城叟才名洵不虛氣吞三斗墨筆吐五車書客

况浮萍合交情碩果餘臨邛有賢令

謂姚番禹齊州

猶足重相

如

人日雨中遲公漪不至

夜夢羅浮春碧苑千樹霞醒來枕上雨落盡城中花東
風冷咲人謂若坎井鼃當門列雉堞雲霧重周遮我懶
不能出招呼及鄰家速客客不來舉杯還自嗟一歡難
強致由命匪由他

用昌黎語

謁南海神廟

姚侯送我遊黃灣澄江一道晴無瀾黃昏到岫天色變
徹夜震撼號驚湍平明謁海神雲氣解駁光斑瀾殿中
擊銅鼓聲落海外迎潮還巡簷繞廊看古碣手剔碧蘚
青苔斑或欹或仆或屹立節角劇殺形模殘煌煌

御書碑迴出唐宋元明間浴日孤亭表其右七十二級

直上窮躋攀不知搏杲出地幾千丈頓覺東西南北四
望無遮攔驪龍吐珠蛟歎涎陽烏擊水鼉移山祝融分
位當炎躔萬象呈露秋毫端紫霞紅浪上下兩摩盪中
有萬點風檣竿星流電掣到廟下一一椎髻垂花髻吾

皇膏澤被百蠻遠人畢至邇者安自從計臣握筭變新法
鹽筴纖悉多歸官廣川大澤禁漁獵網漏魚鼈羣生慳
問神受封今幾代蒿目豈不知時艱 國家大事必祭
告謂是正直靡欺謾幽明盱蠻一氣旋憂樂當與民相
關曷不草綠章為民請命 恩宜頒但使方隅獲沾山
海利神亦坐享血食無慙顏

附擬南海神荅查悔餘先生謁廟詩 佟法海

先生蒼顏鶴髮七十強磊磊落落詩名天下揚笠筇
鞵芒屨竹杖水浮陸走萬里來炎方羅浮神仙窟羊
城富貴場掉頭兩不顧輕舟獨泊颺旗岡徑上七十
二級浴日亭愁看暘谷金暈浮扶桑直入廟中搗銅
鼓鼓聲遙撼零丁洋蒿目時艱不可說惟神若可默
贊襄高歌如慕復如怨怨到海神神亦傷自從祝融
宅南海風非古昔俗譁張田荒莠長蝨蟲活常平十
郡封空倉一水虎門扼衝要雕蹄鑿齒通來王珠璣
翡翠珊瑚樹玳瑁靈犀琥珀光罔象見利亦忘義擲
揄壑斷雜官商鹽法權法不可問山盜洋盜爭強梁
職守一方司民命安敢坐視蒼生殃獨憑正氣觸百

恠幾夜辛勤草綠章豈知山鬼足伎倆陰晴播弄菽
太陽茫茫萬里九天遠狂風吹倒百鍊劊古來天定
能勝人人定亦能勝彼蒼吁嗟乎人定勝天可奈何
尸位不去慚顏多詩家若有斡旋手請君更作回天
歌

海雲寺同藍采飲王符躬作

波羅廟下凌晨發直到雷峯弭畫橈一綫春流通斷港
華鯨南應虎門潮

水窮雲起得禪關突兀樓臺數十間曲曲迴廊隨步轉
不離平地却登山

木棉兩樹竅稱奇拔地叅天萬萬枝自咲杖藜來較蚤

不關渠事作花遲

一龕容得十方僧個是天然第二燈更約羅浮觀日出

尋師還上最高層

往持塵異時
往華首臺

與番禺姚明府齊州二首

樓指修門別俄踰二十年君顏猶白皙我髮已華顛毛
檄差堪喜玉鳧自得仙春風花滿眼及此話前緣

簿書原不俗插架有牙籤詩好人人說才優事事兼肯
教同列忌難得上官廉驥足行將展毋須嘆久淹

花田咏古

鴈翅城南寂寞濱芳華小苑已成塵珠襦夢斷鷓鴣啼
粉麝香消雨洗春翠輦幾經偏霸主素馨曾識故宮人

賣花擔上東風信流轉人間又一巡

珠江權歌詞四首

一生活計水邊多不唱樵歌唱權歌
蚤子裹頭長泛宅
珠孃赤脚自凌波

剪得青蒲織作篷平鋪如席卷如筒
往來慣是乘潮便
不使朝南暮北風

生男不娶城中婦生女不招田舍郎
兩兩鴛鴦同水宿
聘錢幾口是檳榔

米價高于珠價無就船剖蚌換青蚨
近來官長清如水
不是珠池亦產珠

大行仁憲恪順誠惠純淑端禧皇太后
輓歌二章

形史媧皇紀徽音 壽母賢手襄開初業坐閱太平年

典禮三朝備哀榮五福全北山松頂月移照賁重泉

鳳輦承頽地龍樓問寢晨 一人隆孝養萬國仰尊親

海角宣遺 詔宮中闕早春朝班瞻望遠淪落泣孤臣

呈前輩鄭珠江先生

鄭公青瑣彥雅尚寄林泉在野長憂國觀空晚入禪與
時疎應接顧我數 周旋此意能無感依依杖屨前

偕梁孝穉遊法性寺有懷心月上人兼示希聲

學子四首

有約尋僧去攜筇出郭賒東風吹白髮春事到梨花石
畔三生路林間一味茶橫枝不傳法消息問誰家

一片青苔色當門屐齒留近身無俗物望遠得高樓轉
覺城中隘真宜象外遊折腰吾不慣到此小低頭

落葛樓下

心公影堂在焉

欄楯遙相望中開一畝池波明堂欲動魚樂我先知惠

遠流風在柴桑入社遲勿嗟耆舊盡弟子總能詩

藥亭舊與

心公結詩社于此

蓮漏晨猶滴齋鐘午罷敲沙彌通佛性居士慰神交

座間

喜晤周乳峯

庭長枕榔節窗臨翡翠巢重來應未厭幽事滿

西郊

長壽菴坐湛菴禪師方丈聽談石公舊事

津梁誰得限傳法到交南涉海如航葦還山遂築庵劫

難逃宿業風不動昆嵐賢嗣真龍象千鈞獨力擔

齊州於縣治之左新闢園池名梅花邨暇日與

客同遊索賦

蒼苔一曲轉東垣廢地俄成十畝園行處軒窓多入畫
望中花柳却疑村南通海眼安池位北引山光落酒樽
直作吾廬吾亦愛萍踪隨水欲生根

上宮竹莊為余寫青山歸權圖公漪有詩戲次
其韻

舊聞五嶺皆炎熱到此能無憶冷泉不謂留行無地主
老夫興盡却迴船

為友人題暮雲春樹圖二絕句

渭北與江東斯人兩不作借取一幅圖為君論詩學
暮雲與春樹此景世不乏借取一聯詩為君論畫法

佟醒園以騎驢出嶺圖小照索題戲作六言律

詩一首

我愛竹莊妙手為君寫此橫圖天南豈無鴻雁

醒園與中丞為

兄弟行故云

嶺北猶聞鷓鴣莊言非馬喻馬佛說騎驢覓驢

一笑不離行脚阿誰先取歸途

時余亦將歸

題翁蘿軒為藍公漪所画枯樹小幅

故人垂老交情為寫枯枝贈行喚起羅浮春夢來聽紙

上秋聲

有以白菜餉中丞者中丞有詩屬和韻

閉門風味宛然存。菜把猶多餽。送痕傳語園官。須手種
亟乘春雨。斲籬根。

王符躬舍人席上贈許蒼嵐

許侯天下才。曾宰樂昌縣。官如已墮甌。棄去胡足戀。避
逅結襪生。呼朋開廣宴。若乘斑駁來。遇我心相善。昨日
誦君詩。今朝識君面。冰壺貯秋月。表裏皆可見。平生千
丈氣。對酒尚豪健。一吸盡一升。卷波看白戰。商聲帶河
嶽。風日為之變。我欲和此歌。朱絃忽中斷。

清涼山莊圖符躬屬題

舍人示我山莊圖。生綃橫展五丈餘。良工三年寫始就。
金谷輞川何足摹。君家舊住清涼麓。萬里江天入遐矚。

故應胸次豁然寬占斷此山猶未足石頭城門平旦開
千巖暖翠排空來珊瑚碧樹好顏色照耀初日生樓臺
樓臺高下無重數徑轉溪迴總迷路標題一一都有名
毫末微茫指其處問君結念母已奢洞天福地歸一家
潰成奚翅萬金產還恐山林跡尚賒君言好事皆虛事
架構良難畫差易未能依樣買園亭乍可隨身蓄巾笥
海山兜率吾不知此圖要亦人間稀神仙只被瑤京誤
埜鶴何天不可飛

正月晦日喜雨中丞見示原韵即以志別

風花半落經春暖雷雨初來送曉寒農事相關公最喜
物情不隔我同歡雞鳴如晦方懷友蛙鬧何知豈爲官

借取一篙清漲水野人歸欲濯纓冠

題上官竹莊羅浮山圖

大瀛海外有十洲巨鼇不上龍伯鈞何年背負蓬島至
兩山合一成羅浮竒峯三百三十二一豈易窮冥搜
眼中孰是好奇者上官山人今虎頭山人欲爲山寫照
直上崔嵬走翫戲朱明古洞華首臺佳處真能領其要
歸來繪作指掌圖萬象攝入摩尼珠綠毛鳳挂佛子髻
五色蜺化仙人襦我方神遊力不足爲爾題詩展橫幅
正緣身不在山中識得羅浮真面目

光孝寺與咲成上人

訶林冠嶺外重是古道場摩挲菩提樹躡躅風旛堂不

見祖師面徒拈一瓣香上人方坐雨咲客疲津梁

次韵中丞公夢羅浮作

有意遊仙事竟違羅浮未到我空歸輸他準勅狂開府
夢裏乘鸞獨自飛

將發珠江遇李約山觀察自粵西來訂同歸之

約

世途歧出處長恐見無從只隔東西粵相望千萬峯君
其李元禮我豈郭林宗江上同舟約何期邂逅逢

海幢寺十二韵

阿字禪
師道場

洞宗衰復振派衍自天公半是逃名客羣稱出世雄雲
幢標郭外香界湧南中填海爲平地參天起梵宮歛成

疑鬼運幻出儼神工穗石浮佳氣朝臺拜下風五仙皆
法護十力盡神通蹠踏諸方徧跣跌片席崇我來塵世
隔師去影堂空法供瓶爐潔齋厨菜豉豐映階筍竹翠
耀眼木棉紅緣境他生結留詩記此翁

二月八日初離廣州

來時麥苗綠歸路麥穗黃南方冬春交物候總不常可
憐百萬戶戶戶資春糗曩苦食無鹽今愁米價昂温風
送微雨中有餅餌香忍飢待食麩差勝犁遷荒

荒老荒
等名

嶺南廢
田有遷

舟過三水邑宰徐君來晤口占贈之

徐由庶常
改官新莅

茲
土

三水合流處孤城近海壖誰知花縣宰舊是玉堂仙
俗觀新政官情耐左遷天涯相識少為爾一停船

羚羊峽

兩崖挂羣龍下飲一江水水窮山忽住水轉山復起草
木所不生石頑盡橫理惟聞靈猿叫杳杳雲霧裡

朱觀察紫垣席上賦贈二首

我識朱公子佳名在棗香承家新節鉞開府舊封疆才
大移風速官閒化日長三州行按部處處有甘棠
昨入中丞座唵若唱和詩法從前輩得清受大僚知細
雨凝香室春風畫戟枝掣鈴容整老雲樹慰相思

戲東高要令王寅采同年

崧臺君暫憩雲嶠我間闕白髮重携手青春好駐顏
硯開鸚鵡眼香點鷓鴣斑割愛煩斟酌無踰二者間

登端州城東閣江樓

好事何人送酒來自扶雙屐躡崔嵬山從迴雁峯頭落
潮過羚羊峽口回浩浩風聲隨几杖濛濛蜃氣出樓臺
天公不薄將歸客霽色今朝為一開

時久雨乍晴

望七星巖

維北有七星天樞永不移寓形忽墮地幻作岩壑姿我
登閣江樓高咏慈恩詩七星在北戶一一俯視之此生
名山遊待了婚嫁期泊乎婚嫁了筋力恒苦衰輸他有
力人濟勝忘嶽崎猶賢無目者興到目尚隨

題寅采同年小照

身為端溪主不蓄端溪硯賓戲主不知佐頭方展卷

題李峻瞻移情圖

江峯不比海山深鼓瑟何如聽鼓琴不是琵琶箏笛手
莫從人境覓知音

霍石

有序

南中英石硯山多出工匠補綴而成惟產自沙土
中天然無刻畫痕者斯為上品余歸笈得二枚焉
一為佟中丞所贈峯勢迴環中穿六孔一為姚番
禺所贈勢若飛雲孔大小倍之以尺度之長皆三
寸許世所稱皺瘦透者殆無美不備此遊獲此亦

足以豪矣今日行過德慶舟中無事羅列几案賞
玩不足紀之以詩

韶州山石奇英州山石秀人言奇者雄不若秀者瘦蒼
龍骨離立歲久色微黝脫落之而鱗深埋無底竇結成
岩洞勢潤被沙水激玲瓏具本性感縮聚衆皺斧鑿絕
纖痕中虛互通透偶然遇好事不吝高價購置之几硯
苟命曰小雲岫一拳殊不易况敢望多又而我獨何幸
歸舟誇日富熊魚兩得兼彼美適邂逅款款儼欲飛翩
翩若相就人間陸賈裝金玉難單究千金真俗物至寶
肯輕售何如落吾手出入在懷袖再拜謝故人茲情亦

良厚

望夫山歌

杜鵑花紅映白杜鵑鳥
嗥吐血阿夫去作海上客
阿嬾山頭化為石望夫不歸兮
可奈何蠻風蜚雨春來多

封川

十咏傳嘉祐

宋嘉祐中田開知封州有臨封十咏盛誇風土之美

征途喜乍逢時

平山少盜俗儉戶勤農
趁雨收新麥連邨急暮
春江船多賈客一稔給鄰封

梧州

東粵行初盡三江此要衝
商通藤縣米牌出象州
松北望雲千疊南來瘴
幾重小舟如箬籠雙膝劣能容

雨中飲梧州郡守范拙存署齋

清絕蒼梧郡山城並水涯使君非俗吏官閤似村家雨
戰椽擱葉籬編豆蔻花春寒連日甚勸我酌流霞

與郡丞趙默菴話舊有感

憶昔赴黔幕買帆泝漢陽趙家好弟兄一見傾肺腸吾
兄謂韜亦豪士齒序同雁行君時甫弱冠意氣爭頡頏

往往副虛懷高譚陋詞章風塵一揮袂自爾成參商奄
忽四十年舊遊半存亡兩萍浮大海乃在天一方

東坡詩蒼

梧獨在天一方我髡既摧頽君頽俄老蒼大才屈佐郡何以展

爾長蠻城二月中天氣如梅黃入門巾屨溼急雨鳴淋
浪呼童啓書齋延我臥竹牀此情不殊曩此景安可常
別易會苦難况迫棄榆光臨分留數語俛仰多感傷

逆風上灘歌

船頭喜銳不喜方竹篙用短不用長上灘取逆不取順
出險在閒不在忙老夫昏昏篷底坐靜聽兩旁風雨過
深慚作力後多人成就垂綏一游惰

雨中過昭平縣與馬莘叟

風磴層層上衙齋踞地高到門雲氣合入座雨聲豪已
覺簿書簡猶多迎送勞酒香奴飯白青眼愧吾曹

龍門峽

龍尾千層雪龍頭万斛濤硤形當絕險崖勢故爭高木
馬船名騰槽立藤蛇絡石牢雲端牽百丈絲路辨秋毫

佟名丞貽我羅浮蜨繭數十枚三日前雙蜨先

出置之籠中朝來風日晴暖栩栩欲飛因開籠
放之

五色仙山繭分貽不計枚似貪歸路近雙翅獨先開此
豈籠中物無端入夢來人間何足戀好去莫徘徊

相傳此蝶

雖在千百里外必返故山

楊誠齋詩有韶州山又勝雄州之句余過英德
為進一解曰英州山又勝韶州今日行至平樂
城南羣峯競秀爭奇目不暇給英山又不足言
矣問之士人無能舉其名者然不可無詩紀之
也

突兀離奇縱復橫峯稠嶂疊總無名千尋自拔雲霄上

萬古何曾艸木生
佛指佛螺青未了
石蓮石筍畫難成
天教增損詩人眼
直覺昭州又勝英

晚泊劉公渡望對岸諸峯

澄江一道鏡初鎔
寫出東南隔岼峯
指掌圖中看倒影
夕陽一百二芙蓉

陽朔縣

雲從巫衡來勢落桂嶺外
散為椎結族陽朔乃都會
森競駢植巒巒或孤介
滿眼盡兒孫丈人竟安在
孤城如廢井百堆陷其內
亦復設官司于茲領岩若
兩衙排籤立日與刀劍對
匪曰牧人民而云禦魑魅
昔賢遷謫到所以多感噫
俾山蒙惡名夫豈山之罪
不作一錢直

斯言毋已太 聖朝懷遠人吏職視殿最此邦瘴癘區
遷轉異流輩于今號捷徑上考率三載寄語親民官後
來須自愛

春燒

粵俗不好生連山發春燒新萸與枯楨往往同一燎昆
蟲方啓蟄被虐慘無告造化豈不仁吁嗟落蠻徼客行
天南陬半月抵都嶠侵肌苦毒霧白日罕朗照五行或
偏勝風痺恐難療焉可無繼離易疏以離上三爻
繼明者為火來為万
物燥人情懷所便即事具慶弔此樂非彼欣相哀莫相

誚

桂江舟行口號十首

龍江驛前水倒流竹棚移上別山頭趁虛人去愁喚渡
失却閤沙剗木舟

灘江江色綠於油百折千回到海休多事天公三日雨
一條羅帶變黃流

水自東流客自西經過大抵是淒迷木棉枝上鈎輶鳥
夜夜夜深不住啼

下灘不信上灘勞比似登山步步高好語梢公牢把柁
上前只費兩三篙

行近昭潭灘倍多艣郎勸力唱牙何此聲莫作尋常聽
便是湘南款乃歌

南望蒼梧北桂林中間七驛瘴尤深不知雲氣藏多少

能使蠻天日日陰

霧雨濛濛霽景稀
人編蕉葉作蓑衣
櫓搖漁父唱歌去
牛背牧兒浮水歸

戍旗相傍有人家
水退依然就淺沙
二月芳菲看已盡
滿灘蘆葦自開花

過盡頑疆亂石堆
繡山一穴忽天開
明知不是秦人洞
容得漁舟日往來

一月春寒甚臘寒
北風颯颯上檣竿
南人不辦冬衣服
也道朝來被勝單

飲同年叢汝霖桂林學署兼志別

不以他途雜時猶賸此
官名傳人口易實獲士心難行

色春將晚離筵花正殘蠻城一杯酒懷抱若爲寬

上巳前一日發桂林

連日輕寒連夜風滿城
桃李一時空伏波門外梨花雨
春在鶻啼猿嘯中

靈川縣齋清明

已過上巳即清明一月天纔兩日晴
記取靈川好風味
新茶新豆到山城

平蠻歌爲靈川令樓敬思作

槃瓠遺種成野豕充拓百粵西南間
桂林所屬半猺獞
猺性稍馴獞性頑獞中廖三乃最狡
結砦背子

義寧縣山名

藏神姦義寧邑宰畏如虎長惡不復加
防閑康熙五十

有六載遂逞螫毒為民患

叶平

公然越境大劫殺乘勢搖

動西江灣

東西二江在興安靈川兩縣界中

靈川樓侯奮髯怒一念軫

卹周痾瘵請于中丞願勦賊朝發夕下無留艱官軍壓

境屹不動旁睨翻咲書生孱豈知仁者必有勇勇氣遠

過齊成觀

出孟子註疏

力捐百鎰鑄戎器更募丁壯踰千鍰

仲冬誓師謁神廟聲並淚下垂潛潛與神明共守土

捍禦災患宜相關狼貪豕突忍坐視一任滿耳啼孤鰥

陣圖兵法貯腹笥臨事布置神安閒先營壁隄後糗糒

下極坑谷高躋攀天寒雪少但瘴霧地盡石出皆榛菅

孤軍采阻三百里間道別取千尋山賊巢漸近徑弥惡

出賊不料攻而環焚林燎穴何處遁照耀岩壑朱旗殷

渠魁就殲脅從赦散以畝畝閭闔自從出疆迨飲至
三十五日師旋般明朝獻馘上幕府隊仗整肅排班班
受成例應給大賚為國惜費情非慳有酒盈缸其色碧
有羊在牽其首盼侯不居功以歸眾卑醪挾纊昏均頌
人傳封事上 北闕我適問道將西還過侯治下暫弭
檝為我掃榻開門櫺杯闌抵几聽陳說竊嘆膽氣何其
豨如聞鼓聲作餘力如覩介冑當躬掇 朝廷設官鎮
羣獠文武分職毋相奸至今儒臣建偉績壯士母乃多
頽顏是庸作歌勒諸石義在小雅誰能刪他年采入桂
海志碑額不愧書平蠻

樓敬思朱襲遠追送于大融江賦三言古詩為

別

胡桐花万堆雪躑躅花千層血大波淪小波沕百斛舟
十夫力居者主行者客湘江南灘水北雲淄淄風浙浙
難莫難此時別

靈渠行

驚瀧下走三百灘上流何至一掬慳灘源濫觴乃在此
七十二重灣復灣此渠鑿自秦史祿初僅能通不能蓄
迨唐觀察李濬之添設陡門三十六石槽石斛升斗儲
一門典守用兩夫鑿隄前啓後下板修綆汲船如轆轤
雷轟電掣飛一綫盈縮直從呼噏變官船銜尾客船停
那得人人與方便勸君小泊底須愁不過多為半日留

平生恥共人爭路况有林巒慰勝游

陡中岩岫絕佳

夜泊鐻背伏波祠下湘灘二水分流處

伏波祠廟枕江濱湘北灘南兩派分新月滿船天在水
蒼梧回首萬重雲

興安田家

澁勒連邨綠樹濃家家臨水設機舂刀畊火種風初變
問是山農是澤農

夕抵全州城外

晨發鐻背潭暮抵洮陽境急流二百里一宿兩程併去聲
道塞世多途疾遲吾有命適來非意計及此聊乘興
我湘春樓鬱鬱蒼松逕城南松徑亘百餘里相傳陳堯叟所植
咫尺不可

尋黃昏風雨橫

零陵道中

旗脚東北擲朝來乘便風清湘送帆影翩若南歸鴻臥
看兩岸山白雲起蓬蓬前飛不作雨掠過青玲瓏導我
向零陵為我驅霾霧在遠睇歛接緣沿路靡窮昔讀子
厚記神遊乎其中溪山豈不佳好事疇繼公便欲訪古
蹟征途去匆匆無人為指似艸木徒籠葱

題浯溪寺中興頌磨崖碑後

在祁陽縣東南五里

靈武功成賴朔方中興名號遂歸唐少陵善頌無多語
勲業汾陽異姓王

千古磨崖一統碑後來山谷有題辭獨教官蹟留餘憾

不刻春陵數首詩

三月十五夜湘中見月

于役忽半年孤懷寄歸艤北來四十宿今乃辭瘴鄉地
當衡永交水派瀟合湘明波蕩圓魄春月如秋光乾坤
清氣中草木流真香粼粼風乍發濛濛夜何長遙聞漁
父歌鼓柁下滄浪白鷗飛不到江永烟蒼茫

過郴江口有感于杜工部事

十載遊巴峽三年客楚疆青袍常避亂白髮儼投荒許
國才難盡憂時命不長靴洲疑冢在過者亦神傷

望衡嶽

昔遊曾到長沙郡三十七年今又來夜向湘江聽雨過

曉從衡嶽見雲開
帆移九面鏡中轉
雁斷一行天際迴
欲著青鞵還自嘆
已無脚力上靈臺

徐靈期南岳記衡山者朱陵之靈臺

淶口沽酒

沙灣小市柳毵毵
酈淶筴成味最甘
滿引一杯歌一曲
無邊春色洞庭南

醴陵縣

長沙封壤盡僻路
極崎嶇一水趨湘急
孤城入楚深
怪禽嗥少伴
斑竹泣成林
苦語騷人得
幾同木客吟

前過常山玉山今過醴陵萍鄉四縣令同以一事去官偶紀之

朝廷惜民力大事給郵符
朱邱徵求急皇華道里紆
上

官曾有檄小吏似無辜獲罪由胥笏寃哉何易于

自湘東驛遵陸至蘆溪

黃花古渡接蘆溪行過萍鄉路漸低吠犬鳴雞村遠近
乳鷺新鴨岸東西絲縵細雨沾衣潤刀剪良苗出水齊
猶與湖南風土近春深無處不耕犁

復入舟

天公假我一日晴籃輿軋軋山中行山行既盡復買棹
欹枕夜聞雷雨聲諸灘暴漲波雲雲人與鷗鳥互相雜
秀江橋外櫓枝柔穩過袁州小三峡

牛欄鍾山昌山三
峽在宜春分宜兩

縣界
中

盧肇宅在宜春城外今為學宮石筍一株猶存

相傳唐時故物也

舊聞盧氏宅中有讀書臺地以名流著人探古蹟來便

應呼石丈幸不中碑材顏魯公事見歐陽四門集秀色如堪挹摩挲

一片苔

分宜感事

曾從史館見長編太息明朝嘉靖年牛李恩仇初植黨

京攸父子互爭權東門牽犬情相似西市駢臬世不憐

贖檢鈴山籍官簿兩橋猶盜水衡錢嚴氏父子敗後有司籍其家事見鈴

山籍官簿中當時于州縣城外造兩石橋費各鉅万世蓄皆盜官錢為之鄉人不知至今猶有稱道其事者

清江道中

甘林百里夾清江岼岼風來白雪香何減浣花溪上路

人家多在果園坊

重泊鉛山河口却寄施渟如

弱纜牽船與岸平一支春漲轉山鳴坐看片月流雲影
臥聽長風挾雨聲此地故人曾有約重來小吏最相輕
講堂不到吾滋愧為報新編志已成

去春曾枉書幣邀余修鵞湖書院志

今屬豪租就施已內擢離任矣

朱甥德璵出家為僧法名某號渭宗今住沙溪

靜室舟經其處留詩一首

汝甥吾是甥夙世世間緣見面尚相識出家今幾年但
能修苦行不在學參禪蚤晚黃梅雨隨農且種田

自題粵遊草後

老夫不怕寒怕熱冬月出門夏到家輕負嶺南三百顆
此行剛看荔枝花

一日倒吟詩一章中間未覺應酬忙無端來往萬餘里
題徧前賢謫宦鄉

敬業堂詩集卷四十八

敬業堂集卷四十九

海寧查 慎行 悔餘

餘波詞上

余少不喜填詞丁巳秋朱竹垞表兄寄示江湖載
酒集偶效贖焉已而偕從兄韜荒楚遊舟中多暇
徧閱唐宋諸家集始知詞出於詩要歸於雅遂稍
稍究心自己未迄癸亥五年中得長短句凡百四
十餘闕甲子夏攜至京師就正於竹垞留案頭許
加評定旋失原藁已四十年矣曩刻拙集時頗以
爲闕事雍正癸卯正月忽從沈子房仲楚望椒園
兄弟獲此抄本故物復歸殊出望外昔人有悲墜

履哭亡簪者茲集之失而復得視敝履著簪不又
多乎哉因取前後所作編次爲二通用少陵詩語
題曰餘波集仁和趙子意田爲補刊于詩後初白
翁手識時年七十有四

沁園春

寄徐初隣金陵

鐵鎖消沉江勢東來直下金焦想笛賽婆官淒清舊步
鼓迎龍戶寂莫迴潮啼殺棲鴉滴殘晝漏昨夢回頭覆
鹿蕉無多恨最傷心兩字怕說南朝水亭閒望勞勞
但春去春來急景銷嘆廢寢孺垣棠花漠漠故家門第
燕羶飄飄欲別誰留欲歌誰和細馬馱過皂莢橋無人
管拚酒邊歸路風墮鞭鞘

金縷曲

送盛鶴江入都

酒罷昏星沒正春江揚舲捩柁曉程催即十載誇張才
人事香傳茶經俱輯詩草又新來成集湖海名流徵欲
起賸唵窗席冷無人奪睂子研且勤滌京華不少閒
遊客料紛紛彈冠結鞵乘車戴笠同學行藏都在眼幾
箇文章得力悵生事逡巡五十誰信蘆溝橋上路有布
衣障扇騎驢入定那處相逢揖

滿庭芳

為叔母葛夫人五十壽

耳厭笙歌庭無鶴鹿等閒甲子空徂象牙齒冷白髮蚤
隨梳三十年來舊事傷心絕人世全無多付與前塵小
劫彈指過須臾如今剛半百長明燈下勤禮文殊幸添

香掃榻未要人扶猶有高堂健在依樓處仍作兒呼春
風過綠楊門巷兩兩聽慈烏

金縷曲

過家黃門伯如圃

明月湖誰賜羨歸來平分五畝就隣買地洛社池亭平
泉石也要乘閒先置問某水某丘曾記里巷不教車騎
入便近城大得山林意都寫向畫圖裏 小船撐過花
邊市甚當年清絲豪竹近來多廢野鶴汀鷗閒門外抵
得署書幾字关行馬郎君官貴故客尚尋東閣去愴霜
天白菊階墀閉爭得似陪公醉

風流子

喜韜荒兄楚歸

村莊如畫裏維舟了微雨豆花秋看楚俗攜來人情糲

粗吳霜未老鴈膳蘧蔬

音求搜

茅齋下瓦盆隨分設烟火

隔廚幽有兔褐茶香侍兒織手鵝黃酒熟奴子平頭
我歌兄按拍行樂處何似竹脆絲柔才隔巷南巷北別
樣風流問瑞草橋邊誰貽紅帶富春江上自有羊裘一
任酒徒星散去覓封侯

雙雙燕

寄聲山姪

過荷風了向羽扇蕉衫小年偏永青帘換苧轉首涼秋
鬢影舊事有誰尋省酒分與詩緣俱冷可因幸舍供魚
忘却鱸邊歸興引領山田一頃有被阪文瓜交媵香
穎平生期許不是不堪馳騁且學蓬茅臥穩筭此處原
非捷徑甚時撥權重過話向竹窗烟暝

敬業堂集卷四十一
三
金菊對芙蓉

西水吳氏故居

鳥啄風箏蛇盤鬥拱高下一帶樓臺自綺羅叢散瓊扇
常開晴攀翠竹題名滑有幾個過客多才大都憐取狂
春柳絮倦畫桃腮北園南埭東齋看花磚經雨塌盡
莓苔時有隣娃貰酒換得遺釵眼前便是西泠路春波
外行意徘徊去年崔護此門此日生怕重來

沁園春

淮郡主故苑

戚里繁華貴主山莊駙馬山亭有記曲紅紅歌珠串串
隔帷黑黑絃索泠泠曉宴催粧夜遊傳蠟長使行人駐
足聽滄桑後問楊家田氏幾主曾更銅環不鎖嚴扃
漸拆盡春山屈戍屏但斷浦蜻蜓飛來衣桁空庭蝙蝠

掠過窗櫺樹色濃
枯花陰疎密幾處蒼蒼
夕照青休回首料華林平樂一概凋零

前調

薔薇

濃暖送寒小雨捎晴紅雲一欄漸竹架欹來柔陰孃孃
枳籬缺處狂蔓看看高似窺隣低還拂地幾度牽人宛
轉間斜陽外映淺深向背巧逞朱顏不禁刺弱枝繁
笑欲折還休好是難便撲蝶花前微揜羅袖踏青階下
先護雲鬟戀醉多情與春無分長是開時芳信闌餘香
好把膽餅貯露黃額輕彈

前調

送友人遊洞庭山

藥裹一囊釣綸一竿清遊在茲嘆越國浮家今無高士

吳歌倚棹誰譜新詞壓擔書輕扶頭酒重過盡松陵知
不知垂虹畔問楊郎鐵笛可有人吹 粘天萬頃玻璃
只芥羽中流點破之正石尤風定烟棲花陽熟梅雨足
水到茶陂朱橘論錢黃柑佐釀好在秋光拍後期歸颿
便乞玲瓏片石與致茅茨

滿庭芳

陳簡齋先生新葺閒園隨黎洲黃夫子
過訪留贈

結構初完規模漸拓春田又看成蹊夜來好雨洗盡種
花泥宛似元家上洞鳴鳩外麥浪吹畦橋南北傍籬壘
石緩步得攀躋 渾迷回櫂路烟添柳澹雲暖茶溪正
客來問字主愛留題任是游人小住憑闌候風信難齊
重過好東園步屨書籍記曾攜

瑞鶴仙 秋柳

風情牽暫住，乍鷺老秋絲。一年好處依稀，想前度爲憐
伊。腰瘦不成，遙妬河橋古渡。冷蕭蕭馬嘶人去，傷離亭
挽盡長條，夢繞江南舊路。無數涼蟬抱葉，雨燕辭梢，
昏雅匝樹。時光流轉，但暗裏驚衰暮。被西風吹得江潭
搖落，不道樹猶如許。記濃陰隔浦，移舟濛濛暖絮。

臺城路 秋聲

商飈瑟瑟涼生候，孤燈影搖窗戶。堤柳行疎，井梧葉盡
添灑。芭蕉片雨纔聽，又住正澹月朦朧，微雲來去。菽菽
空廊有人，還傷繡簾語。多因枕上無寐，攬二十五更
殘點，頻誤響玉池邊。穿鍼樓畔一派難分，竹樹零礧斷

軒更空外飛來攪成淒楚別樣關心天涯驚倦旅

金縷曲

送陳六謙謁選北上

身世看如此笑忽忽纔停歸櫂旋催行李一領青衫羶
樣重塵土不堪重洗况此去復三千里舊社雞豚期且
近數同遊何可無吾子想別後當然爾 故人誰續藍
田記便時時哦詩松下何妨公事雙耳未聾丞不負正
好聽歌博醉若行止余皆無地兩角耕牛容易辦怕家
人催捉東山鼻終擬索長安米

沁園春

友人邀余賦閨中雜事分得三題

刀尺親裁裹束初成吳綾蜀羅想芙蓉新樣粉嫌輕汚
醪醑餘馥氣愛輕呵壓袖曾經墮釵知否未許輕移到

錦窠勾留處較佳人雪腕方便誰多
合歡光景些那

更不奈春來獨自何看碧流難浣並頭留影餘温猶印

半面成窩熊取宜男豹堪辟魅不比銷魂寂寂過相思

恨是為君留下長託微波孟襄陽詩漸看春偏芙蓉枕楊誠齋詩醑釀為枕睡為鄉

李義山詩冰紋簾上琥珀枕旁有墜釵金鳳翹唐書五行志韋后妹為豹頭枕以辟邪伏熊枕以宜男李太白

詩為君留下相思枕託微波借用宓妃留枕事

前調被

計幅裁量平寬窄隨宜温柔幾重自金針縫罷絲連錦

段瓊烟熟透香護筠籠泥我朝朝伴他昔昔軟愛裝綿

煖愛烘玲瓏畏問凝脂團雪可怕消融覆來青翰舟

中便慙繡羞珠兩不同有侍兒帖妥曾鋪曾疊添衣斟

酌經雨經風欲起還遲背人覓得一角偷藏鳳味紅尋

思久柰略回身處好夢無蹤劉孝威謝賚錦被啟鄂君
慙繡楚侍羞珠李義山詩

青翰舟中
有鄂君

前調 席

脉脉盈盈軟勝桃枝密于白藤甚燕山飛下詩才比雪

楚江攜到夏簟分冰薄取輕安滑防新浴傍枕依衾夜

夜曾憑繖藉喜稱身熨貼擁背親承 小憐玉體橫陳

料此外嬌憨着意憎問角展蘇薰為誰鋪襯汗沾柳葉

幾度消凝飛燕能輕玉環能重肥瘦虧他一一勝拋人處

只蕉心半卷不在多層尚書疏篔簹席桃竹枝席也白樂
天詩六尺白藤床李太白詩燕

山雪花大于席杜少陵詩恩分夏簟冰蘇
薰席見唐書地理志柳葉席見西京雜記

惜紅衣

金魚

瑤甕盛苗銀床轉水十分愛養日日來看問甚時纔長
紅鱗欲透漸小隊尾株分樣兩兩淨綠涵空足庭階清
賞 美人閒想竹葉為船吹風戲來往鏡光忽皺牽動
簷蛛網恰是一羣驚避沒處幾痕圓浪待縠紋旋細又
噉絲萍葉上

海天濶處

螢

滿庭草色猶青不知熠燿從何至幽光明滅隨風難定
乍飛還止兩兩三三離離合合池邊林際自隋宮散後
便成廢苑再不見繁華地 巧向輕羅扇底逐佳人映
將綉綺夜窗歸晚紗燈滿貯帳紋如水月落香沉流輝

耿耿一床秋思好伴他簾外疎星幾點照儂無寐

翠樓吟

蟬

密柳河橋疎祠院落陰陰幾處同起身輕容易托也還
戀故園清庇蕭然高寄奈未穩吟情何來塘臂驚飛候
乍移別樹殘聲猶曳多事慣攪閒眠聽雨晴昏曉更
番到耳日斜樓角外草草又催將秋意風襟露思訴不
了清空涼暄畧記且休把冠綉髻翼依稀似

眉嬾

新月

乍殘陽西歛一鈎心字蚤已挂林杪影薄銀河澹沉波
處水門未收晚釣窺窗正好被牆陰強半遮了素娥寡
不待及時鐘斟酌畫眉蚤一任淺顰相效比五更東

畔別弄纖巧肯落佳期後團圓意向前屈指應到黃昏
悄悄可有人下堦私禱問裙帶吹風消受拜兒多少

多麗

咏水面木芙蓉花

美秋容佳處偏宜映帶恍移在滕家圖上涉江正好采
采憶宿粧水殿醒時是徐孀老去姿態粉鏡初收銀蟾
欲瀉池光冷暗銷螺黛誰憐取浮紅漂白長逐鴛鴦隊
湘君遠未應遺却雲裳霜珮渾不管拏芳舊侶經營
一笑難再倚西風自傷遲暮木末含情更何待脉脉遙
望依依莫戀憑渠流向煙波外便從此東西飄泊打併
團圓在差勝似落瓣船頭花花相背

綺羅香

橙

翠淺疑流黃嬌欲滴屢報新霜番次顆顆低垂葉底微
窺密刺記小庭細雨初移是籬落年時秋尾似蓬萊金
醴嫌酸清泉簌簌已流齒 憑闌幾遍細數自攀條摘
後枝頭剩幾佳客重來取給猶煩一二擣金齏風味攢

看散綠霧清香繞指乞人前橘樣偷藏團圍懷袖裏杜少陵

待主簿主簿嫌其味酸魏王花木志有給客橙文與可

金橙徑詩小船燒薤擣香齏蘇東坡詩使君風味好攢肴

白苧 不見陳撝謙一年有餘填此寄之

小春前重九後風光如此渾無聊賴獨客坐傷往事恁
匆匆綠醪銀榼歡呼地只隔一重城似隔了千山千水
向來酒伴零落而今餘幾問眼中有誰跌宕如吾子

猶記紅牙按曲素手捱箏醺船波蕩同過娉婷小市便
許我重來怕添顛顛歌筵側畔好先安筆研待題詩尾
却蚤暗風催轉庭梅一梢偷試屈指前期漸及燒燈矣

娉婷市五代時
鍾傳侍兒所居

臺城路 寄題初隣水亭

兩湖千頃菱花白卷簾漲痕微退蓼坼烟輕蘆村霧重
相望渾如天外雲山一帶箕城北城南故人都在釣具
詩筒鷗邊穩棹並誰載 三間料合閒閉向東西南北
生事頻悔歸索長枵遊蹤漸近此段妻兒應怪前期不
礙有蕪擔挑鱸緯蕭攔蟹秋雨濛濛重來聽欸乃

惜餘春慢

王桐村新葺小軒索題句

韻華堂集卷四十九
九
堂笏猶存檐牙未落佳處略煩結構移將雞柵掃却蟲
窠頓覺規模非舊花外清陰又添竹補三竿弓開一肘
喜南榮北檻絕無塵到坐消閒晝真不礙野老墻低
書聲出屋兒比王商能秀水門繫艇兩兩歡迎開徑頻
來社友我欲從君卜隣初念逡巡甚時始就但等閒荒
了先廬不願諸甥似舅

百字令

壽張魯白

年年相見認黃山一叟雨襟風帽梳掌摩挲雙髻改髮
短不勝簪蕩病未拋詩貧偏愛客此品今來少莎廳竹
徑自攜敝帚勤掃不是不想田廬夢歸路斷恨終身
難了况乃迎門無稚子執研星星又小溪友留魚園官

送菜只合他鄉老舉觴相屬期君同拾瑤草

臺城路

九日同人小飲和朱日觀

黃烟藥市門開處秋潮乍通村舍竹葉灣東菖蒲港北
好友特煩枉駕微霜昨夜正紅啟榴房翠除瓜架一笑
相看風前烏帽並時卸年年索郎高會多情懷酒伴
長在籬下桂板催詩柳圈板襖總付漁樵閒話重尋舊
社笑如此江山登臨多暇後約蒼茫菊枝聊滿把

邁陂塘

送韜菴兄往白下時余方計楚游兼訂偕行之約

計郵籤苔苔幾驛長亭七十有五杉青牖外揮盃別一
片繁笳疊鼓投贈句恨不滿綠波碧草江郎賦杳無重
數向紅板橋頭青楊巷口都是黯然處應悵望舊日

杏花春雨重來雙燕曾誤莫愁艇子空城畔潮落潮生
如故邀笛步好借取半帆風色先期赴逡巡且住待結
束遊裝明年相趁共聽鷓鴣去

八歸送燕

曾棲幕上暫依宇下弱羽處處堪寄翩然便欲辭巢去
似怕尋常巷陌再到難記還細踏簾鈎認取又相對呢
喃未已徘徊意應惜茆堂此後整長閉抵得江南一
度雪程風驛草草詩人下第春來且住秋來且別身世
誰非旅邸笑行藏未穩與爾飄飄定何異知明歲花濃
柳澹社日前頭主人歸也未

詩人下第用章孝標賦歸燕事少陵詩請看處處巢

君屋何異飄飄託此身

玉蝴蝶 雪

聽到五更風息
幢幢燈影愁度長宵
曙色飛來銀海
翻動銀濤
鏡光融拂
花還起研冰薄
呵氣旋消
任兒曹團
獅作戲
愛竹頻搖
蕭騷荒村
南北數家
煙火迷了
漁樵野濶
天低絕無人跡
過溪橋
草堂清梅
魂欲斷
江市遠
酒價應高
待招邀
晴邊蠟屐
踏破瓊瑤

望湘人

寄季叔楚署

便鄉音無改
簿領垂衰
星霜兩地
頻換
遠信難真
孤飛易倦
惱殺衡陽少鴈
僕射洲空
夫人城老
落帆幾片
自峨眉
看冰雪
崢嶸
眇到蜀江
春暖
旅食舉家
未免只龍
陽難辦
木奴千絹
問湖北
湖南米價
新來貴賤
楚船青

崔吳船赤馬一水籤程好笑得歸來尚有田園不愧詩
家素澹

鳳池吟 上元村居

陰過新年寒餘舊臘時序取次侵凌漸人家門巷紫姑
神降閒卜豐登柳又誇腰東風拂檻弱難勝水村烟市
一番晴意融盡殘冰 城中父老歸晚說曉來微雨不
礙張燈笑亂餘景物昇平故事小縣還仍可惜溪橋梅
花無主月空凝黃昏淺料玉龍哀怨難憑

臨江仙

北山寓樓與宋梅知夜話

霜雪長途君勸矣遠遊吾計忽忽兩萍浮海偶相逢茶
烟禪榻行復幾時同 漏轉城頭春夜永小樓缺月疎

桐燈花何喜也能紅亂鴉棲後數盡北征鴻

瑞鶴仙影

客舍咏燈花

一枝鮮潤蘭膏裏蠅頭紅蕊初著戀他短檠惜惜不動
為誰的爍蘆簾紙閣聽不了風鈴風鐸問何如高燒銀
燭箏柱鞞絃索方便煩憐取欲剔還停任教開落不
如儂意只尋常照人淹泊遠信無憑浪傳與屋頭雙鵲
趁沈沈細雨春夜動春酌

八歸

寒食塘西道中與張介山別

梨粧欲試杏泥未和芳訊饒半落後踏青共指長橋路
且喜討春舊伴近隣都有籬落青旗書字大笑村店家
家誇酒好趁取水泛茗西天氣弄晴候遙想會城此

夕花游一曲多少行人回首湖船猶冷風前雨外燕子
未知歸否漸南程催赴勝賞幽期惜分手知甚日粥香
錫白散了新烟重來看插柳

減蘭 己未四月別家作

父書盈簾手澤猶新何忍讀也要頻開卷帙須防飽蠹
來阿奴碌碌門戶全生難免俗莫便如儂氣沮妻孥
八口中 仲弟

依依弱弟歷齒垂髫憐叔季孟去天涯仲氏殷勤卽汝
師小時了了滿望長成頭角好玉樹庭階添取新陰
待我回 三四兩弟

再三憐汝蚤歲無娘今喪父慚媿稱兄忍聽閨中夜哭

聲 練裳竹筥量力行看他日事此別經年慰藉飄零

仗嫂賢

小妹

白邊相杵我為長貧還累汝催上鳴機又替征夫製夾
衣 蹉跎生計浪走風塵非本意不為封侯怕被人呼

馬少游

內子

明年十二典謁可能陪客位懶惰無端失學從渠正可
憐 文章何用却望家風留句誦勿更嬌癡夜枕晨餐

恃母慈

庚兒

多年隨我戀主青猿情亦頗臥犬籬根也似痴頑免應
門 閒中日課掃地澆花無不可留片蒼苔莫被羊牛

踐踏來

老僕

臺城路

初有江漢之役朱日觀王子穎桐村祝
豹臣家西海叔德尹弟眉山姪追送於

朱與三表兄村
莊席上賦別

無端遙指西南路
驪歌棹歌難理
萬里瀟湘何涓一夕
說甚才情綺麗萍蹤如寄
望楚尾吳頭浪花無際
屢改行期多應依戀為知己
銅盤燭黃初膩
卞杯闌氣熱
合座成醉
殘月流空
曉星當戶
一片離愁
頓起天涯
情味
筭只有清風
故人相似
遠信毋忘
時時煩附鯉

木蘭花慢

端陽前二日程禹聲徐淮江餞飲
南湖舟次兼訓別俞右吉先生

迤迤生浪態
明鏡裏寫樓臺
正竟渡中流
綵旗颭灩畫
鼓喧逐離筵
恰逢此節愛
登梓鄉味近
黃梅白白王餘
入饌青青昌歎浮杯
碧苔賤楮親裁
句好勝金釵
時欲

邀妓不果道擊楫舟中彈箏車上猶有人才旁觀定應見晒
感先生勸我盡餘醅京口且乘潮去武昌曾為魚來

臨江仙

平望驛

兩岸菰蒲聞笑語人家只隔輕烟銀魚曉市上來鮮一
湖鶯脰水雙榜燕梢船屈指郵亭剛第一眼中長路
三千南風吹夢到江天故鄉桑苧外無此好山川

朝中措

夜遊虎丘

笙歌十里過山塘到寺已黃昏客散當壚酒冷僧歸別
院茶香一奩止水一堆講石幾轉迴廊及取無多清
景獨吟獨步何妨

百字令

楓橋夜泊

帆檣隱隱背孤城家指青山一髮樓櫓亭臺都過盡離
了烟窩霧窟漁笛蕢洲樵歌葦岸雲吐初弦月橋邊弭
棹愛他風氣清越 猶是夜半鐘聲今來古往過耳成
飄忽可惜閒吟佳句少辜負青鞵布襪獨壘吹笳斜塘
擊檣草草催明發照人無寐螢光幾點出沒

宴清都

過無錫風便不及泊遙望九龍在蒼翠
間向隣舟分得山泉半瓶烹茶破睡

陸羽經猶記數水晶品江南曾占第二濃翠堆鬟空青抹
黛濛濛雲氣好風吹送吳船甚失却登臨勝地聽杳杳
幾杵疎鐘烟林正擁山寺 百弓割片茶園生涯飄泊
談何容易銀瓶余井夢中空想轆轤聲起五湖者番遊
興賴吹火烹泉有此把宜壺淨洗供春絕勝吳家買婢

供春吳願山婢名始製宜興茶壺俗以為龔春者訛

玉漏遲

夜過毘陵

微涼乘小雨朦朧殘照尚含輕霧楊柳風多新月又生
南浦正是落潮時候有人在沙頭搖艫相倚去鄉音互
答愛聞吳語已過七里郊垌聽茅店呼燈漁梁爭渡
去江漸近警急猶傳列戍欲問隋家故苑知十六離宮
何處城外路黃昏角聲如訴

帶人嬌

丹陽道上

鴨嘴呷嘔羊頭軛軛人道是朱方古陸黃泥幾坂清流
幾曲烟起處更添幾椽茆屋地少江南雲寬江北眄
不到長天遐目官田放馬民田放犢願微雨村村稻鉞

抽綠

水龍吟

登北固山

岷峨雪水消來，洪濤萬里從東注。蒜山擁髻，瓜州曳帶，遙遙江步。滿眼興亡，季奴草長，人來古渡。看南颿出口，城頭蘆管，盡飄向揚州去。泥馬當年半壁，更誰暇，倉皇北顧。錦袍繡甲，英雄事業，却輸兒女。夾岸黃塵，滿瓶名酒，中流畫鼓。到而今，贏得登臨，悵望渺平沙樹。

滿江紅

京口曉發夜泊觀音門外

空濶江天到此地，覺吾身小寄身外。蕭然一笠飄然一
權鐵瓮城高，鏡吹動金山寺近。鐘鳴蚤把，滿壺細酒。京
酒 名酌波臣開懷抱。日上處，東方曉。帆挂候西風飽。儘

迢迢極望白門斜，照兩岸山移倒。退馬千層浪逐前飛，
鳥比下灘出峽順流船兼程到。

永遇樂

燕子磯同韜荒兄觀劇

陡起千尋嶙峋突兀濤吞萬古晚景融怡扁郎却指日
落波平處蘆洲一帶柳堤數折人與鳧鷖並住還怕向
絕頂憑凌沈沈愁滿烟霧隔船遙聽哀絲豪竹
隴隴輕蕪村落難尋微風吹遠近轉磯頭路開元弟子
郭郎賀老剩想衣冠南渡也抵得商女歌殘淒涼

解連環

訪周雪客於汝南灣不值

大功坊下喚涼篷艇子撐入圖畫過水亭面面扶欄想
人隔荷風坐消長夏楊柳灣洄問徧了三兩鄰亞道水

西門外載酒載花別築亭榭
當時櫟園官罷便手掃
棠陰自闢精舍愛儒雅
又到諸郎笄裙屐風流肯輸王
謝舊熟才名何必更十年
同社還只恐吟成白雪調
高和寡

滿江紅 輓胡二寄先生

蕭瑟崢嶸先君子舊曾遊地腸斷是麻衣入拜總帷仍
几出周禮疏九土難埋漂泊恨一棺竟蓋飛揚氣問茫茫七

十五年來天何意
亡國夢秦淮水懷舊賦山陽里甚
後生前輩無情有淚對此江山堪一慟如先生者今餘
幾但陶家門外白楊風蕭蕭起

前調 胡震生索贈

白鷺洲前芳草展滿灘新綠舊來是南康幾葉一枝片
玉手種東陵瓜五色眼看度索桃三熟嘆過江人物柳
吹綿飛相逐兒女怨清溪曲男子恨新亭哭剩輪困
劔膽酒邊棖觸八十高堂行尚健六千君子今誰屬指
長江如練去吞天鍾山麓

渡江雲

蔡璣先鉉升兄弟招同王璞菴胡震生
泛舟秦淮席上分調

人家垂柳亞水蒨花放簾卷落潮天岸容隨棹轉碧檻
紅闌佳處互洄沿時光縱好奈撩人滿目山川把一幅
烏絲欄展同寫入新篇尊前故鄉在望七十長亭問
離觴幾遍還又傍荷陰擘藕葉外聞蟬斜陽帽影微風
袖知後期更落誰邊欲別也河梁錦纜重牽

邁陂塘

飲胡星卿先生白鷺洲荷亭上

繞名園渟泓淙淨白蓮鏡裏開合檀橋西岸清無暑迎
面香來恰恰烟景豁望不盡城端山色林梢塔移來小
榼喜蘿薜侵衣葫蘆貯酒觴政罷秦法 渾忘却舊日
朱門邛閣沙田十畝環匝柴籬近與隣翁接鷗鷺馴如
鵝鴨泥滑滑任急雨催詩飛去無多霎芒屨醉踏正蓼
外潮平花西月到歸路聽鞦韆

安公子

題余鴻容杏花村居是日品茶而不門酒填詞紀之

幽絕城南墅女牆一曲當環堵門外綠陰陰乍合啼鶯
選樹障扇驅塵剝啄尋常去為新茶偶爾留人住正小
年平半日影婆娑停午 少日誇豪舉近來好事猶如

故無酒須酤也不費茅容雞黍直愛君貧雜坐忘賓主
借玉川七椀為談麈看清風出屋洒作竹梢涼雨

應天長

蔡龍文招同方邵村侍御吳待觀孝廉
胡震生王璞菴家韜荒集懶園席上分

調兼示令
季五玉

舊時歌管地想丘壑閒情謝傅曾寄江左風流曷未封
胡又起百年花木秀數不到平泉小記筭只有桐梓樊
家芝蘭袁氏羨爾好兄弟問第五名高何如驃騎永
日碁聲翻盡楸枰餘勢便長安似此但對酒厭談時事
既醉也畫舫斜陽柳邊還樣

八聲甘州

送王璞菴入山左戎幕

怪相逢何晚又蒼茫千里動離愁聽一聲畫角滿城落

日客散江頭杳杳天低鶻沒西北是青州淮水新來淺
馬渡中流 見說舊年山左正塵荒古驛草占平疇喜傳
來好語五月麥先秋若天心肯憐赤子且從他賣劍買
耕牛官居暇劉郎雄概好臥高樓

樓中天

發金陵王汾仲胡震生追送于江干留此志別

揚舡欲渡正吳天六月江流怒漲昨夜酒醒今日別起
喚炎風五兩潮嚙空洲雨來高岸一片蒹葭響山川如
畫殘樽重此相向 可奈芳草東西浮雲南北去住都
無狀珍重臨岐留欸語只要毋忘疇曩知有前期難分
此夕遮莫勞長想有書好附紅鱗白鴈還往

滿江紅 野泊即月

牛渚西來三十里平蕪極目趁幾箇舸艚相約剪江同
宿沙際曾閒窺白鷺槐陰邃晚歸黃犢喜無名小聚自
成村清流曲籬缺處門栽竹烟起處蘆編屋早映檐
一帶野田新綠微雨去添峰頂翠好風來皺波紋穀更
依依飛鳥帶斜陽投姑熟

驀山溪

天門山又名蛾眉山

曉江寫鏡兩道蛾眉展別浦翠生烟與染就黛螺深淺
三竿日上宿霧欲消時風力軟遠帆移百里看猶見
當年太白傑句曾傳徧氣象吐長虹最好是天門中斷
眼前光景同此一經過問作者更誰與俯仰才何限

浪淘沙

繁昌舊縣

略約傍蒼葭酒旆天斜縣南風色野人家黃石堆牆茅
當瓦還占平沙 烟外曉程賒去去天涯嚴城何處不
吹笳恰似廢池喬木畔一一啼鴉

碧芙蓉

望九華山

參參伍伍倚翠屏千仞芙蓉碧聚微陽初逗幾峰見日
幾峰還雨浮嵐擁靄青不斷池陽路乍前頭秀偏人來
被長風猛送帆去 擬向遙空攬取把玲瓏一壺貯怕
仙人掌上九女鬟輕幻成烟霧讀罷青蓮句問東道今

誰為主拚盡日閒倚船窗舉頭數了重數

九華今在一壺中白雲穿

透碧玲瓏皆蘇東坡句王介甫望九華詩峩然九女鬟

爭出一鏡函李太白望九華贈韋仲堪詩君為東道主

于此臥雲松

南浦 皖口舟中

吳楚此分疆，瀉中江直到長風。沙嘴潮滿，浸青山澄如練，隱隱魚龍欲起。南城飲馬，北城吹角，蒼煙裏萬井樓臺連。埤堦俯瞰，渾疑無地，霞標古塔，層層控巖關。閱盡舳艫千尾，美滿挂帆，風朝來便又送遊人過此。湘天尚遠，亂雲生處，浮濃翠喜近大雷西岸望。一點小孤如髻。

點絳脣 雨後泊李陽湖

晶晶空江釣絲風起，漁灣暮春。鵝飛去幾點沙頭雨，過盡輕雲忽見晴霞吐。垂楊渡亂峰缺處，回首來時路。

燕山亭 月下聽隣舟彈琵琶

水濶山長二十五絃清怨不勝迭奏何處飛來一派秋
聲颯颯驚沙洒袖喚起愁心向曲浦移船相就還又問
截取曹綱是誰妙手 忽然裂帛聲終正雨止風收碧
天如晝月絙漸滿漏箭頻催人間幾人回首楓葉蘆花
便比似潯陽江口邂逅傷若箇迴燈添酒

長亭怨慢

過湖口追荅俞大文兄弟

論要害西南鎖鑰萬馬奔騰雙鐘噴薄湖波橫截孤城
勒住亂山脚烟消日落倒影動千家郭下有一雙魚曾
傳與故人夙約 寂莫嘆我經此地恰值機雲入洛閒
尋遊跡空悵望幾重雲幕把兩年別裏新詞半題在江
聲小閣待掃壁來看應憶南飛烏鵲

渡江雲

六月十五夜同韜兄琵琶亭對月沽酒
不可得填此解嘲

烟波三十宿一輪鄉月兩度向人圓
洞庭西上路弱柳江頭旋換白門船
天涯淪落泣青衫司馬誰邊漫留得
琵琶亭古冷落四條絃依然流分九派
劍拍雙峰嘆荒涼滿眼便擬博兄酬弟
勸醉也無緣前生定入東林社知後期
重結何年征夢潤白雲回首江天

長亭怨慢

武昌縣西道士湫亦名西塞山絕壁
臨江上有張志和祠按西塞山在吳

興唐書張志和金華人顏真卿守湖
州時志和來謁願浮家泛宅往來苕
霅間踪跡未嘗入楚也陸放翁入蜀
記云即玄真子漁父詞云云者第未

詳考耳

浮空欲翥翠色移來正扁舟剪渡一峰忽轉黃冠形狀

迎人似俯殘霞紅歛送幾點神鴉飛去指前頭隱隱孤
城已辨黃州烟樹磯邊小作遲留向香火荒祠笑問
漁父鰕魚肥美筭只在苔雪溪山深處生前好事多著
了清吟幾句又分得西塞山前別派斜風細雨

臨江仙

漢陽立秋

楸葉剪花桐落子半年節物旋更湘裙紅映漢江清擣
衣人去浦口暗潮生斗柄西回天在水家家暑退涼
輕數聲促織近窗鳴二更月落燈火已多情

河瀆神

桃花夫人廟

霸國好山川夕陽平楚蒼然洞門玉象閉嬋娟露桃開
謝年年至竟息亡緣底事花並樓中人墜千古消魂

都似此細腰宮又何地

驀山溪

王沙畧庭有菊數本課僕除草編籬以護之亦知花時未必留賞聊以習奴輩之勤

爾

階除荒菊刈草還成圃天意却如人便添洒夜來疎雨
竹闌干外翠色曉葱蘢秋未老露初濃誰識栽培苦
年年九日籬下曾期汝拋却故園叢又坐閱歲時荆楚
西風有信獨客去無程霜降後鴈來時自有黃花主

虞美人

乍涼天氣清于水漸近中秋矣玉鈎素手兩纖纖指與
畫樓西角月初三王昌只在牆東住消息憑何處半
年清夢落天涯今夜一燈明滅忽思家

臺城路

自到江陵三得王桐村書感其勤倦之意填此奉答

來鴻去燕綿綿路驚心二二千里骨月無多平安却賴
六六紅鱗頻寄吳霜初試想橘辦分苞蟹螯斷跪穉程
村邊柴門相望老兄弟謂子穎登高却當此際長江遙
極目何限雲水沙市留詩旗亭畫壁誰管渚宮故事蘆
花風起正鼓瑟人來數峰銜翠渺渺知音滿懷空憶子

前調

妓席作

犀帷乍卷佳人出夜堂靜惜惜地兩板紅牙一枝清笛
傷有盧郎偷倚歌頭酒尾漫博得當場厭厭微醉爾許
風流烟花南部興聊寄座中年少凡幾是誰先感嘆
家隔千里珠箔飄燈紅筵奪目惱亂江東蕩子天涯失

意倩半幅羅巾搵將清淚檐雨瀟瀟曲終更漏起

賀新涼

秋晚獨上荊州城樓

飛過蠻天雨背孤城夕陽西下大江東去虎渡龍洲依然
在長是馬嘶日暮有獨客登樓懷古豚犬英雄都不
問問成名孺子今何處秋太晚散砧杵山川洵美非
吾土向江陵袂衣催換一番寒暑翠冷紅酣微霜後變
了荆門烟樹且目送邊鴻南度隔岸殘雲流欲盡拍空
濛下是衡陽路愁浩浩共誰語

氏州第一

與韜兄江陵分手久不得武陵消息
近傳已赴南昌幕府因便寄懷

木末霜催風信乍緊龍山別酒曾勸路指桃源小船壓
浪安穩過湖眠飯峒戶燈烟滿底處覓秦人雞犬譜首

新詞竹枝聲裏蠻謔倘變 客况蹉跎秋晚晚盼消息

魚沈素斷聞說東游滕王閣下趁一帆風便念孤飛何

日到參差翼江湖定倦應記蘆花舊時羣有襯爐峰小

鴈

小鴈過爐峰李長吉寄小季詩中句

木蘭花慢

雪後再登龍山落帽臺

暴晴冬候變晨旭暖凍痕開趁雪洗荒郊馬蹄躑躅不起纖埃前遊菊枝初綻又蜀江寒碧接天迴遠客豈期再到閒僧及記曾來 生涯落拓情懷餘悵望費徘徊諒戎服參軍旁人應笑知己猶猜風前偶然落帽也何妨借酒寓恢諧便作此鄉故事一堆土阜名臺

夢橫塘

題城南田老齋壁

鵲巢門巷老樹低牆映簷一帶城雉三逕頻開俗士駕
尋常不至雕斛栽花瓷盆養石滿欄蒼翠愛微霜初度
濃日猶溫都未有殘冬意楚南風物無多剩何參老
去能談往事清景依然只難得閒人如爾擬約箇酒徒
再到想見梅邊雪翻蕊洗研求題嘗茶看畫與重揩
几

拜星月慢

夜渡荆江時官軍初下湖南

霜壓疎篷水銜柔艣虎渡晚來催喚刀尺寒衣急砧聲
不斷孤帆色漸入西南天地背指江橋酒幔第一籤程
報公安小縣記今宵旅宿辭津館清無寐勸枕惟長
歎幾番起視婁氏泛中流纔半漸微茫月墮楊潭岸湖

天濶燐火如星燦又依依移過前灘起一行驚鴈

楊潭岸在

荆江見岳陽風土記

驀山溪 冬杪留市道中

冰開平澧輕浪參差起樹杪一峰晴映極浦蒼烟小市
長竿曬網盡裹著漁舫風澹處雪消時好景江南似

亂餘雲物不料還留此過眼惜匆匆指前路又侵亭燧

時聞禁旅尚駐辰州白雲回首家在五湖東湘渚鴈洞庭魚會我

南遊意

齊天樂 庚申武陵立春

綠蘋兩岸晴光轉關心乍聞綿羽樹掩蠻旗草迎塞馬
冷落滿城簫鼓寒梅未吐被橫管聲聲催開最苦南陌

東郊有誰結伴討春去
當時賓客遊處蒼苔閒尋徧
猶記題句野竹遮隣山茶出屋此景眼前非故蕭條如
許賸鷗鳥灣洄幾家還住及泛扁舟水生挑菜渚

前調 元夕

春來天氣不長好已經幾番風兩柳態將絲燒痕猶黑
未辦青鞋遊具良宵三五對燭影搖紅缸花細吐遙憶
家園隔年燈下小兒女
當時舊踏歌路聽十番大小
拍徧南部村酒柔情隣姬索笑都是夢曾遊處楚南風
土但月黑軍城棲鳥匝樹還有樓頭鼔鼔傳漏鼓

徵招

得外舅陸先生都下書

陂湖萬古浮烟地光風這回流轉碧水上蘋魚迨春冰

初泮殷勤傳信到喜白髮加餐猶健勝友題襟舊交結
襪歸期荏苒應念楚天遙開緘處人在洞庭西岸鄉
思與離愁縱急觴難緩我來幕下翁留輦下總非始願
幾時共情話田園對窗燈一盞

邁陂塘

得盛鶴江書兼寄文可上人

憶離筵綠醪紅燭黃頭入饌新饜滿湖烟月歸人醉催
解荷陰弱纜波瀲灩美食宿程遙多傷沙頭店長魚似
劍每對了南京便思鄉味此意肯忘整誰更念青草
瘴生寒歛蠻禽啼近山檻傳來懷袖加餐字慰我萍漂
梗泛差不憾想還往風流二老年來占紗幘竹簟問醉
裏逃禪吟邊聯社別後興增減

珍珠簾

早春寄弟

何心遂作周南客，煞等閒暗把年光拋擲。路已苔苔，况阻湘帆楚驛。笛裏梅花飄欲盡，最難禁、冷猿濕雪脉脉。正黃昏愁坐一番憶別。咫尺家山不隔，喜池塘佳夢來依。今夕南畝共巾車，向草烟牛跡到此始知田舍好。悔鞍馬江關跋涉，役役咲逡歸計幾時纔決。

朗州慢

余來武陵當兵燹之際，觸目荒涼，溯劉賓客之舊遊，懷愴憑弔，與姜白石追思小杜寄慨畧同。因和其自度揚州慢一闕，以見意用其韻而易其名，亦猶春霽秋霽之不改調云爾。

屈子亭荒隱侯臺廢，沅江苦霧難晴。聽鷓鴣叫處，又春水初生。問仙路紅霞遠，近匆匆花事愁滿。刀兵但烟扶

殘柳馬鞭青人空城 風流司馬向詩篇都寄閒情有

曲度南音采菱歸晚白馬湖平併入竹枝歌裏遊人去

流盡灘聲念劉郎前度也如杜牧三生 招屈亭隱侯臺見劉集中采菱

曲竹枝詞皆其在朗州時所作

武陵春 泛小舟渡沅江尋梅

城外清江江外草草色已迎船人在煙波換靄間渡口

夕陽山 隔岸酒帘招我去春意在漁灣醉插江梅帽

影偏攜得一枝還

木蘭花慢 季叔將往辰州以佩刀奉別

書生緣底事都草草學戎裝望盤瓠城南馬頭塵起邊
日無光舊來橫磨一劍知為誰拂拭為誰藏縱使長騰

紫炁宵教輕露寒芒
臨岐把贈意偏長
對此兩茫茫
悵缺底歌殘環邊約負人老蠻鄉
家園五千里外好換
牛買犢返耕桑
留向雞豚春社
恢諧割肉何妨

昭君怨

江樓偶題

風去波紋簇簇嫩柳嬌鴉新浴
樓外晚晴天好山川
一派空濛影裏漁唱乍沈
還起歸興滿江湖得歸無

鬥百草

上巳武陵西郊開游有懷東亭又微聲
山諸弟姪

甲子冥冥半春飄雨無人管
及取新晴袂衣禡疊一領
輕衫催換小城西有柳眉
漁曾木平花堰正馬渡中流
鳧汀嫩綠鷗波清軟
猶記杯浮曲渚草踏斜川
幾處追遊約吟伴去每攜衾
來多聯袂向斜陽參差影亂如

今但薺合沙田人不見湖南岸對桃開俄驚春晚

掃花游

清明後一日再游杜山與山學禪師茶話

去城不遠被野趣招人路迴峰起幾家桃李並隔花姪
姹高鬟相倚弄袖風來好片踏青天氣萸多是夢後韶
光眼前詩意 遙指方外地有白髮閒僧蕭然孤寄前
遊省記正殘燈急雪梅粧初試轉眼春深又和葉摘將
鬻子茶烟裏聽鐘聲再尋山寺

邁陂塘

送楊粲英往湘潭

乍雲開琵琶峰頂撲人嵐氣濃暖桃花水汎清明後翠
轉湘帆一面風色便拍六六蒼灣突過川程半新烟兩
岸喜鮭菜旋通舟車不隔行子望江縣 封侯事三載

未酬初願却從閒處閒看山川洵美非吾土贏得將軍
善飯君莫嘆漸髀肉生來雙掌摩挲徧長沙米賤好壓
取歸航擣香炊玉爾汝互相勸

南浦

次張玉田春水韻

風澹日濃時寫渟泓映徹鏡奩春曉含意待流紅揉藍
淨一抹沙痕輕掃浮萍開處依依倚母鳧雛小遠浦柳
陰魚欲上已接船頭芳草殷勤流下三湘倩并刀與
把半江剪了汀滢小灣洄苔猶濕想有湔裙人到閒情
深淺舊聲舊耳聽來悄試問西陵橋畔路知遊舫新裝
多少

氏州第一

立夏

風雨蠻天節候無準熟衣重御初夏燕未將雛鶯初喚
侶何處故王臺榭好景難拋也第一是橋邊柳下幾顆
朱櫻半甌紫筍客中瀟灑 見說耕犁行已駕尔添種
離離桑柘近水人家舍南舍北正蚤蠶浴罷想一聲啼
鳩到茅檐外薔薇應謝計日晴邊綠陰成重來繫馬

安公子

寓庭芍藥一窠花垂放矣余將理沅南
之棹不及待其開留詞別之

初見叢添蕊小欄一日千回倚風信參差屈拍到今番
第幾冉冉韶華漸入青春尾人欲別試問花知未聽粟
留啼處也喚將離兩字 明日吾行矣等閒負了揚州
紫蠶粟梢頭風物料依稀相似可惜開時少個狂書記
咲眼前緣淺猶如此更休論此外載酒尋詩何地

滿江紅內子三十悅辰寄此為壽是日在桃源舟中

咫尺仙源何處問雲中雞犬剛一笑舊年三十流光轉
眼萬事無如儂失計一家只要君長健把江湖好語報
平安加餐飯天四月江南畔初夏景村居滿正鳩鳴
樾熟野蠶成繭繞膝憐深兒女拜傷心憶侍翁姑宴料
愁邊窺鏡旋添絲歸來見

滿庭芳

從住灘步行渡朱洪溪

雨送微涼客貪緩步意行稍轉灣深到天古木藤老葉
緜蠻野果枇杷初熟繁枝重獺鳥爭攀窺人過一羣驚
竄石上墜啣殘前山尋不到泉聲落澗響珮鳴環便
褰裳欲涉水去足生寒忽展黃雲一片秧田外雉尾堪

刪重循省霎時光景偷入畫圖看

醉太平

船溪驛

山行澗行風程雨程紅榴小驛初晴報前岡路平
溪田碓聲畬田火聲煩他布穀催耕指烟綿草青

浪淘沙

楠村梅花橋佛閣小憇

欄檻落鮮澄倒影分明今來古往一郵亭閣下長橋橋
下澗馬渴泉清拉沓是蠻程難得佳名戍人行盡野
人行如此溪山留不住弦月旋生

好事近

麻陽同天寺僧房

暝色起孤城烟外千峰俱淡竹凡藤床紙帳有新蟾來
瞰山椒一夢已如仙歸路去時暫約略蘋花小港棹

微波激激

南柯子

初入麻陽溪

漱玉風生頰跳珠雪濺肌
舫船截浪去如飛絕勝馬蹄
泥滑汗頻揮山鳥飄紅帶
溪禽浣翠衣只除夾岸酒
樓稀宛似西谿留下櫂頭歸

摸魚兒

遣家信紙有餘幅書此足之

自依人青油幕底征衫再換涼燠
吳雲郢樹微茫外萬
點黔山高矗憑短目眇不到西陂
荷柳東橋竹濃陰淨
綠想香澹風漪塵清苔砌暑意減
新浴凝情處應諒
歸期難卜炎荒馬首人獨匆匆
堠館斜行字手擘藤牋
小幅書未足補一闕新詞架筆挑燈
讀客懷不俗料遠

信來時鵲靈最蚤為我報茅屋

臨江仙

銅仁郡閣雨望

暮暮朝朝多變態偶然一露晴輝孤城四面萬峯圍卷
簾何處雲重雨飄絲 梔子坪邊新漲急鷺鷥立盡空
磯麻陽舫子綠蓑衣白魚三寸江口販鮮歸

花犯

石榴

是何人移從西域幾時到南土依山傍路映絳萼丹華
高下無數眼明我是紅樓主幽遐同恨阻最苦是繞枝
啼血對花聽杜宇

元微之感石榴詩非專
愛顏色同恨阻幽遐

關心節物

記吳孃匆匆曾過了那年端午窗近水人正在綠陰陰
處倚偏髻一痕微逗映小朶珊瑚籠繭虎而今向蠻中

重見紅裙誰妬汝唐萬楚詩紅裙妬殺石榴花

瑞鶴仙鳳仙花

參差開也得看孃孃娉娉垂垂滴滴多般鬥顏色任張

家呼婢韋家稱客小庭南北細飛來丹禽一一向天涯

似慰羈愁與媚煙朝露夕幽絕苔茵稠疊落瓣無多

寸心易結好風披拂草蟲菽菽飛出愛佳名合作女兒

憐取旁人未許偷摘微嫌他拍染紅尖和花擣葉張文潛詩

金鳳乃婢妾紅紫徒相解本草韋君呼鳳仙為羽客劉貢父詩輝輝丹穴禽嬌嬌翅翎展宋光宗李后名鳳宮人避諱稱為好女兒花湯鐵崖詩夜擣守宮金鳳蓋十尖盡換紅鴉嘴

蘭陵王

安丘劉丙孫故相國少子也風塵天未來宦沅州與楊中丞有通家之誼銅仁

郡齋共數晨夕知薄官非所樂也因用其扇頭舊韵填詞贈之

楚天杳奈此山頑石老泥活活苦竹岡頭愁度露猿萬
松杪鴈飛真不到馬足羊腸空繞更誰念釋屩從軍中
有劉郎正年少滑稽何可少嘆相國流風于今頓邈
衣冠只博搖頭笑便東華夢隔西華交在一官爭抵歸
去好君聽子雋鳥懊惱亂懷抱拍平野青徐浮雲海
嶠扶桑日上雞鳴蚤甚登臨回首每當西照鄉關一髮
目已斷青未了

一前調 贈吳鴈山次前韵

絲路杳人向此中易老望銅崖袞袞山尖一握孤雲起
天杪歸飛何日到烏鵲南枝頻繞角聲慘戰地相逢自
嘆臣今不如少君才時所少喜通介如常舊來徐邈

人情爭滿淳于咲問眼中桑海胸中壘塊半生知己赴
誰好依依失羣鳥 煩惱休縈抱有短檝長鑱釣江吟
嶠勿嫌白髮盈頭蚤只無多髣影鏡邊羞照西垣斜日
夢裏事猶了了

木蘭花慢

七夕江口舟中作

晚程西冕路深崦裏著扁舟看薄霧成雲片雲成雨一
雨成秋推篷坐聽餘滴漸輝輝紅日下蘆洲似磬涼蟬
到耳如梳新月當頭

白香山詩巴蟬聲如磬

灘聲東瀉火西流

佳節客難酬憶貫酒湖亭曝衣村巷吹笛江樓孤萍近
來蹤跡擬乘查碧落問牽牛獨夜飛飛鳥鵲五溪渺渺

鳧鷖

百子令 八月十五夜銅仁坐雨有懷德尹潤木

良宵清景莽回頭鄉社年年三五碧海織雲都斂盡空
外涼蟾飛度蟋蟀柴門豆花籬落豔豔疎燈吐兄酬弟
勸中庭好片風露 一自隻影南遊十分圓月不照蠻
方路萬事干戈揮手外咏罷微颺桂樹半嶺猿休極天
鴈斷坐聽瀟瀟雨此時離恨燭花對客能語

前調

十六夜見月發前韻

狂雲妒月甚無情掩却盈盈十五賴是今年秋帶閨還
有中秋一度二八清光隔宵晴意不料團圓吐移來牆
角疎桐猶滴圓露 誰似太白詩豪相邀對影同此天
涯路我欲舉杯餅已臥拚得不眠倚樹椒館蟲吟竹門

風過靜聽翻疑雨
澆沈永夕素娥相
傍無語

李長吉詩
吳夙不眠

倚桂
樹

鵲橋仙

庚申閏中秋

天高露冷一輪山月
又是十分圓候平分
節序屬中秋
問今夕可平分否
桂叢香過菊叢香
淺省對新花殘
酒若教餘閏帶重陽
笑此會已登高後

臺城路

浦市別宋梅知並簡故園諸子

黃花黃葉沅南岸
相逢便經揮手浦口
羈帆尊前新月
此會他鄉難又踟躕
搔首羨獨木船輕
歸程易就我亦
思歸客中送客拘楊柳
舊交屈指某某感
因風寄訊
書疏都有離緒
紛紛報章草草
此外儘煩君口
多能記

否好爲我殷勤徧傳良友預想挑燈故園他夜酒

點絳脣

冬杪發銅仁晚宿松樹坪

醉別江城荒荒野宿投村櫟鷓啼月落茅店孤燈著

老馬迎風衣上霜花薄天垂幕孤雲一握吹散咿咿角

清平樂

平溪道中微雪

深江薄雪人去清浪驛佳句巧從驢背覓此地何來此

客臘梅香遞前山戍旗插過烏蠻天末鴻飛不到傳

烽與報平安

時官軍初
恢復貴陽

洞仙歌

渡重安江

丹危翠險乍懸繩度索井底人從半空落有清江拖帶
抹斷雲根天一綫兩面奇峰峭削 英雄何事業飛鷹

隋處拍岸波聲怒時作便策馬中流馬亦徘徊行人去
夕陽哀角料無分食肉覓封侯笑占夢無端誰如宋楠
食肉占夢出
晉書索統傳

金縷曲

清平縣

雪洗黃茅瘴掃寒空纖雲斂跡層巒獻狀縣小人稀餘
三戶亂後偏留想像也不負詩家吟賞錦市花場尋不
到賸清平兩字仍無恙此個事動惆悵行行相見坡
西望指前頭羊腸武勝塞笳悲壯屈曲歎崎高低路三
十六梯難上煩傳語百蠻君長但使官廉民復業便紅
苗白爨吾亭障圖可按示諸掌

羊腸武勝
二關名

消息

宿楊老驛

百里中途孤城小駟岡重巒復卓帽蒙頭青檀裹手暮
寒猶觸微陽西隋趁虛人散客與昏鴉並宿正山頭野
火燒殘聽風過蕭蕭竹 舊家名酒憑誰買醉零落低
帘剩幅想雪水初添年時此際比舍新篔熟可堪回首
六亭南北一片荒烟廢麓更何時翠袖牽蘿重來補屋

清平豆腐楊老酒此鄉口號
自此至平越府凡有六亭

玲瓏四犯

韜荒兄昔過黃絲驛賦二詞組織極
工今來不無蔓草零露之感填詞寄
之

風凹回鶻冰槽溜馬去來此路相左神傷離亂後事往
逡巡箇征鞍欲停無那問佳名最憐婀娜城北城南堠
長堠短回首轉愁我 蠻孃憶當壚坐有蛛絲迎面伴

客燈火曹家碑背上好字思量過酒人一別紅顏散更

誰把平原繡作做擬寄和歸牋却匆匆未果白香山詩別後曹家

碑背上思量
好字斷人腸

--	--	--	--	--	--	--	--	--	--	--	--	--	--	--	--	--	--	--

敬業堂集卷五十

海寧查 慎行 悔餘

餘波詞下

齊天樂 辛酉貴陽立春

東風兩度年頭尾
 新春舊春如替雪
 點湘蘋烟開湖柳
 又看山梅到此蠻粧
 綰髻待踏月場開
 蘆笙旋起銅鼓
 聲中青紅兒女且驩喜
 鄉風處處都別歲
 華頻改換
 只添憔悴魚上冰
 鮮酒迎臘白畧似溪
 肴村味貴陽魚似吾鄉
 鮮鮮酒似吾鄉臘釀
 東君有意感就我
 他鄉依依萬里也
 擬郊遊
 鞭絲誰共理

瀟湘靜 楊崇木都下書來知外舅陸先生巴南還喜而有作

瘴南雪北千千里感公子萬金一紙開緘欲讀燈花剔
了又紅添雙葢骨肉兩飄蓬秋風便歸裝先治多應偏
臘到家期近猶及看蚤梅未 悵望橋東學圃草堂寒
塵封杖几先君老友惟翁健在忍重來揮淚次第慰家
人定憐取天涯遊子嬌癡剩有外孫繞膝挽須問事

西河

春晴借彭南陔吳鴈山登照壁山佛閣

春乍霽漏天景色清美岩巒無樹可棲烟翠屏凝紫出
郊未惜馬蹄遙舉鞭直上歸碗 懷古意登眺耳程番
今又何地風雲滿眼幾人歌幾人雪涕桑滄陵谷兩無
情危欄詎忍長倚 戰場草淺塵不起變青紅血痕初
洗下瞰孤城井底咲井蛙曾此跳 平 梁只在夕陽邊鷓

聲裏

疎影

賦瓶梅影次張玉田韵

便娟秀月寫橫斜牆角已是清絕
傍我移來幾度端相
欲折翻嫌難折膽瓶位置看如畫
特許伴燒燈冷節被
燭光遙妬無端故向小窗明滅
宛似佳人空谷亭亭
還自顧芳意幽潔為爾傳神
禿筆疎枝試與和花點出
依稀林下相逢處
傍紙帳東風欲活憶孤山
浮動黃昏
曾掃影邊香雪

沁園春

寄祝朱止谿先生及吳太君八十雙壽

碧沼丹崖路繞蓬萊芙蓉小城自樊園種漆琴材並老
帶湖栽柳鷗侶齊盟八十年過八千年近猶記東山捉

鼻情喧傳遍是文翁宦蹟杜叟詩名 簾前曲奏瓶笙
正春酒浮觴花外迎羨先生林下竹身瀟灑夫人林下
梅韵幽清白首相莊板輿聞處愛傍籃輿次第行時光
好願長筵長侍兒子門生

曲遊春

清明黔陽城外作

故壘新烟起數蠻城春事初過百六一片郊垆但幾羣
鴉噪幾聲野哭何處餘喬木全未有遷鶯出谷只誤他
燕歸來舊巢還覓茅屋 細草離離遠綠正馬牝茅疇
健閒黃犢豈少相逢奈踏白軍多踏青人獨誰唱巴南
曲向天涯自成風俗記取鼻飲三升鈎藤酒熟

踏白軍游微騎

也見宋史蠻人以鼻飲
鈎藤酒見老學菴筆記

金縷曲

又何軒前芍藥一叢花時被風雨摧殘而余所插瓶中雙蕊經旬始落一似有情相慰者

戲填此調

姹女粧成坐漸依依與人分去熟朱唇輕破斟酌穠纖
相傍好同此連宙篝火愛紺碧餘香惹唾十日吟牕留
伴客聽藥欄猛雨花期過枝稍弱肯微譚 尹邢薄妬
知無那還防他銅瓶力盡不風自隨天若有情應護惜
把贈將離差可笑寂莫何人似我曾向武陵筵畔看隔
年詩滿紙無心和重對汝鎮愁臥

點絳脣

雷雨初過小軒睡覺歸思忽生

雨過空城輕雷薄靄千山暝飛蚊遶髻睡美軒窗靜
江上黃魚忽引東歸興紅榴褪八番花信報道端陽近

二 郎 神

午日風雨殘酒薰人竟成薄醉友人索
余題扇填詞應之

聽雨聽風驀忽地流光偷換誰能料者般客况南食今

年又半蠻果枇杷偏遲熟有撥刺銀刀入饌

都勻府
產鱒魚記

馬渡清沅買魚配酒去年江館相勸中丞脫略容參

午宴也不用當門懸符結艾幸是把杯人健醉裏詞成

拈須微咲且為旁人題扇剛夢隔一縷茶烟輕颺醒來

靠晚

綺羅香

署庭七夕桂花盛放

風色迴條露華流葉花候炎方特蚤小院飄香及取火
流星曉憑玉兔半面催開喜金粟一枝預報是吳剛妙
手移栽流黃恰映錦機巧高榆天上歷歷比人間叢

樹涼意多少顧影婆娑待月圓時也好想姮娥不耐清
寒步羅襪盈盈先到便從今暗數三開孤芳猶未老人

詩四出花中異
三開格外芳

瑤華慢 賦雞堦

傍松似繖比肉非芝喜筠籠初褪肌分理細晚于瑤柱
嫩于玉筍厨孃好淪觸纖指微防輕損任清涎齒頰先
流欲嚼芳鮮未忍 憐伊產自炎荒數陳家九種圖譜
猶賸人間雋味但風乾日炙封題遠信秋林雨過記竹
下呼兒采菌便吳鹽雪點羹湯那有者邊風韻

松繖出
勞山肉

芝見抱朴子九種
菌見陳仁玉菌譜

拜星月慢 中元夜對月

素角烏烏女垣東畔圓月初生雲表斗柄旋回射西方
參昴曲欄外滿地玲瓏影動壓樹棲鴉纔到漸過黃昏
又窺窗斜照 萋愁邊何限淒清調人無寐涼意蟲先
報此際誰不驚心只閒房較蚤念蠻中天氣晴時少團
圞處忍負秋期好喚熨僮卷起疎簾伴金波到曉

瑣窗寒

中元後苦雨連旬薄寒中人已似吾鄉
十月天氣南方節候無準如此

蟋蟀空廊梧桐別院逡巡暑退雨聲連夜不許新涼替
代直隨他萬馬南來瘴鄉氣候同沙塞把秋期變作做
授衣時節早寒先戒 一帶積垣外有鴟鳴似鬼雞鳴
如晦空齋愁坐擲管讐書都礙况中庭橘未垂條孤鴻
消息渺難待但朝朝目送荒烟去作巖頭黛

夢橫塘

得家信

繩橋夢杳絲路人稀書來歲聿云暮寄到春衫嘆節序
中更寒暑驥子聰明別時猶小今能憶父只家貧世亂
大要憐渠慈母杖休輕與我行不為封侯甚歸期屈
指誤了還數績火蓬窗暗想到昨封題處誰知向雞聲
絕徼孤館愁開夜深雨待不消魂一回對影也悲辛狂
顧

水龍吟

賦霧淞

攢柯密箐層層朝來幻出公超市餘寒未減阿誰裁剪
雪翎粉翅非葉非花疑花疑葉珠裝玉綴笑隋家新樣
都將綺繡強占了瑠璃地城角垂垂幾樹壓鼉廚蠻

烟斂紫天公妬汝微陽院落瓏鬆驚墜人靜空階一聲

清響鏗然到耳倩東風着力喚回舞態與扶頭起曾子固霧

沁花詩無人齊插玉瓏鬆

臺城路 壬戌新年黔中見燕

燕窩山 在城東見黔記 外春來也差池恰逢雙羽舊巷亭臺新

年花草總付零笳斷鼓安巢何處奈地老城荒并無佳

樹小立茅檐飛飛鷲過短牆去尋常不記前度甚來

從海上歸路偏阻蜀霧吞江楚雲迷峽却伴烏蠻久住

乾坤逆旅嘆我亦依人未須憐汝遮眼鄉關濛濛人日

雨

鷓鴣天 花朝晴出郭閒眺

屐齒殘泥冷乍消

冷音另土語以霧雨後路滑成冰為冷

快晴難得是花

朝六千里路連芳草廿四番風剩柳條

紅狺狺紫姜

苗亂山何處酒旗招鷓鴣聲裏遊人少啼過頭橋又二

橋

曲游春

白櫻桃下偶題

瘴雨長飄瓦改東風幾信偏滯寒色二月初頭見櫻桃
一樹花頭漸白剛被晴烘拆已便有遊蜂窺得勿嫌相
對無情猶是上年吟客 彷彿梨雲杏月覺香泛南枝
春陰較密占斷花朝勝寒食江南燕簾吹雪可有人憐
惜是當時下階曾折爭奈亂後風光斷無消息

李長吉詩下階

自折櫻桃花

唐多令

後園紅杏林檎二本今春忽枯惟李花獨盛

一種舊春風年時經眼同好花枝能白能紅曾被上番

吟賞後蝴蝶夢忒匆匆

顏色等頭空孤芳賸此叢伴

詩懷清許盧仝應有縞衣來叩戶人尚在百蠻中

韓退之李

花詩夜領張徹投盧仝乘雲共至王皇家

驀山溪

又何軒前芍藥今年忽發並頭一枝楊中丞屬賦

頰顏怒拆變作嫣然咲淇澳有佳人一箇箇傾燕艷趙

含情顧影相傷各低徊曾妬否解憐無鏡展新粧肖

金壺勝賞絕代矜難老卍字小欄前問誰步春風獨蚤

佳名好換莫道是將離一覺夢兩娉婷此譜楊州少

徐文

長賦狂苞怒拆蕭子顯詩
佳人淇澳出艷趙復傾燕

臺城路 二月廿九日黔陽送春

年年絕域春華改驚心這回較蚤唐帽山前襄陽橋外
一片明波碧草尋芳事了正翠駟人歸閒吹竹韶路指
西南關城宛轉楚天杳 當時嬾歌花館亂餘留想像
別夢繚繞紅袖當壚綠楊蔭馬底處曾經買笑時光縱
好但為雨憐花因風送鳥去已忽忽任他三月小

綠頭鴨

聽任小史唱提水調其聲婉轉幽咽相傳明沐國公鎮滇時宮人所歌者

面如花畫圖樓閣神仙入侯門琵琶偷學未登狎客紅
筵轆轤長胭脂井淺別翻新調鷓鴣天三百年來故宮
幽怨此聲今被棘僮傳似花底雛鶯調舌嬌小又清圓
歌頭轉一絲風細裊斷還聯 問人間幾回曾聽哀彈

不用么絃便司空向來見慣也同司馬泪潜然我亦無
端為伊腸斷淒涼何況館娃年杯闌後曲終夜半風雨
到燈前疑有箇人兒擁髻愁對伶玄

滿江紅

送楊劍川罷官歸雲間

鳥道羊腸最險無如作吏又何况烏蠻南角浪穹左
臂髻底霜華官興嬾看間黃色歸心遂便抽帆到岍有
何難能知止九峰畔雲霞膩三泖外烟波細是前張
後陸高賢故里秋兔弦開樵擔月春蠶絲引漁竿餌問
先生此樂幾人同人無幾

金縷曲

客窗初夏觸景思鄉

地盡天連蜀聽啼鶻幾聲催放四山躑躅看到此花人

情倦翻愛陰陰夏木來掩映隔窗棋局翠葉枝頭紅相
亞儘殷鮮不受蜂須觸一顆顆荆桃熟 露梢添引光
如沐只從他出堦成筍出牆成竹遊子新來田園夢長
繞采桑隣曲鎮邂逅村粧不俗插髻野芳風吹隴乍歸
來微雨鳩鳴屋裙共草一般綠

清平樂

初發貴陽

莎衫藤屐陰雨霉天積晴路一鈎初得月門外馬嘶人
別 來時車牽間關去時烽火平安咲問遠遊何事也
如絕域生還

如夢令

平越道中遇雨

苦竹岡頭滑路郎馬來從何處行不得哥哥相勸解鞍

且住杜宇杜宇又道不如歸去

無悶

黎峨阻兵漫題旅壁

旌旆連郊鼓角連營井底孤城如陷
嘆萬里歸裝一囊
一劍欲踏芒屨徑去奈霧雨冥濛
雲濃澹路難如此客
愁正劇猿吟又慘誰念梗猶泛對亂石荒屯亂山孤
店爲旅食年深易成秋感壞壁題詩好在記醉眼昏花
燈明暗喜夜來布被涼生已夢清湘裊纜

生查子

六月十五夜黎城坐月

青山淡欲無月到中天小却扇一襟
風暑氣清多少
蘆壁吐燈光中有隣娃笑
明日二郎祠去約乘涼蚤

臨江仙

立秋後七日自漣溪乘舟東下

撲面風埃行倦矣，急來照影清江。滾波激石勢相撞。小船篙槳便穩穩，下驚瀧。預遣兒書報歸日，到時黃葉秋窗。滿沽菊釀待開缸。家山無限好，蠟屐更添雙。

洞仙歌

過楠木洞舟人指點石上有沉香船云是呂仙留蹟

蒼灣一轉愛微波，如鏡倒插雲鬟翠。蒼影乍洞移楠木，船指沉香仙路遠。縹緲似非人境。晚來微雨過竹樹，蕭森做弄秋聲入。清聽猛喚起塵機。草草經過負多少，松梯苔磴賴沙鳥有情。伴人歸與並坐江心。烟濤百頃臺城路。
武陵換船自龍陽至長沙

山窮水遠蒼茫外，楚天頓開心目。紫草灣洄白沙洲。渚都入郭，熙橫幅家家農牧。已閒却人牛葑田早熟。漁戶

風烟插竿晒網出茅屋
程程鷺眠鷗宿長年能一一
指似遺俗岸濶三秋湖平八月又轉清湘幾曲浮青剪
綠趁細雨蕢香沽將醞醪好卸輕帆古碑尋岳麓

瀟湘夜雨

長沙水檻亭為趙雲岑副使作

甃石為池移橋就砌多年結構纔成長沙風物官閣有
園亭分取三湘別派波光動簾額盈盈中秋對月應更
好盃底吸空明 笑先生愛客門庭如市宦况彌清一
片冰壺裏寫出閒情直把西湖比似也宜風雨也宜晴
只少得篷舟一箇同聽煮茶聲

百字令

曉發湘潭由青草湖出洞庭看月

江潭一棹趁宵來三十六灣秋漲二百里程高枕過席

底平如掌上菰葉翻翻蘆花漠漠日落魚吹浪天開地
坼人間此境何曠 屈指况近中秋斂舷歌罷晚景尤
清亮我本南遊無一事愛答榜歌漁唱湘渚移帆洞庭
賒月俯仰應同賞玻璃忽動冰輪湧起千丈

臺城路

登岳陽樓

三年行盡西南路重來岳陽樓下宿霧占風晴霞辨雨
變態空濛難寫乾坤作冶看萬象俱融鏡光東瀉一笛
飄蕭秋心吹滿洞庭野 舊來戰塵初洗憑軒休涕泗
目斷戎馬遠浦沈烟輕靄點葉旣濟風波翻怕琴高待
跨奈地少雲多魚龍未化剩有閒情坐觀垂釣者

長亭怨慢

壬戌九月十三日到家作

甚當日去家容易秉燭羗村夢猶恍惚不記飄零却憑
兒女笑年月為渠覓食一笑蛩蛩負斃傾倒薄游裝聊
付與烟生煬突 咄咄山陽聞笛罷獨自心傷存歿時
右朝生還偶遂別中事逢人怕揭料柴門更有誰敲便
菊徑從他蕪沒好勤課童奴重理釣磯耕垆

摸魚子

涉園訓別魏禹平

放扁舟清風涇上此生快事為最城隅一徑蒼然轉滿
架朱藤高挂鶯語外正人坐春風花被遊絲礙名園入
畫記杯賭循環牀移曲尺佳夕鎮相對 留連處却指
離程如黛眼前光景難再更為後會知何地浪態檣形
相背無可奈笑去住行藏總被浮名絳還應自愛待挾

妓春山尋僧秋社重與了吟債

念奴嬌

贈別碧紋錄事

尋春較晚人都咲小杜舊時光景曲港橋通門啟處翠
柳紅薇交映喚起梳頭慳慳猶帶中酒催花病有心絳
蠟夜闌留照雙影却是我未成名匆匆輕別了翻嫌
薄倖此意沉吟行復住不為石郵風緊明日回頭離烟
恨水多少愁人境問重來約叮嚀莫似瓶井

李嶠詩消
息似瓶井

一萼紅

重過飛翠軒

枇入杷園有翠禽飛出消息遞前軒柳外飄燈花陰籠
月歸後畧帶微醺剛博得橫波回盼喜嫩約不負去時
言來便重來拋人容易休似初番為我迴身幾遍道

護他窮綺終自憐君高燭融銀沉烟續篆且與並坐黃
昏也莫管漏聲長短拚一度相對一消魂明日倩誰相

伴水上湔裙

戲用王建
宮詞中語

渡江雲

禾城荅華義逸見貽原韻兼送其北行

歸裝何晚晚落帆天際雲樹及冬晴故人欣握手寄我
新詞屬和到春城兩湖烟雨鴛鴦外流水無聲又早是
南檣北柁滿眼促征程空艚哀狷斷峽宿昔曾遊向
閒中循省爭得似花街壓笛燭院聞箏歡場事往渾如
夢夢醒時說與誰聽空自咏白頭洛下書生

百字令

徐淮江別後寄調有書記狂遊之語次
韻荅之

經營買笑甚娉婷十斛明珠論價月下星前花底醉偶

逐春風良夜采了薜蘿種將紅豆雲散清歌罷三生一
夢未應輕笑遊冶 多少劍客呈鷗琴姬擁鳳豪舉誰
能借自檢空囊償酒債差勝博鳥壺馬知己書來佳人
別後孰是忘情者報章草草却愁洗研重寫

解連環 紀夢

蕉陰隔院有到窗殘月移來一片更添他幾點疎螢正
角枕紗幮夜涼人倦薄被香消留縷縷手縫針線感殷
勤就夢直似憐儂寄宿孤館 邂逅難償初願只燈花
猶似那回爛熳盼舊約曾指紅榴又點綴蒼苔下階踏
徧曉路侵星欲去也晴梢露泫悔當初輕別西灣茨姑

葉爛

解蹀躞

接德尹武昌信知春杪已作嶺表之遊

依依漢南柳色舊是懷人處
柁樓水拍長隄又春暮流
下黃鵠磯頭好憑賴尾紅鱗與傳尺素
眼中路一笑
賓鴻社燕勞勞各如許
嶺南此去一事却輸與計日蒨
子初紅從渠飽噉千枚可能分取

芭蕉雨

本意

夢覺微涼生處曉來傳點到分明
語起凭去闌杆細數
鷺地捲作秋聲梧桐別樹
淋漓不怕絲雨只恨風掀
翦乍翠羽飄飄細分縷
渾忘了舊題詩直待重展蕉心
再來覓句

祝英臺近

賦蝶和韜荒兄韻

去翩翩來劫劫秦宮一生狎花落花開好景過如霎料
得庭院深深重遊較晚也惆悵成陰綠葉恁輕怯憑
仗膝閣丹青長依畫簷妾為汝叮嚀雙飛避羅箒防他
撲向春衫買絲繡樣把金粉損將一捻

離別難

寄書

一權別忽西風映門秋冰芙蓉畫梁雙燕少錦字孤鴻
杳樓頭他夜夢忒惺忪疎雨外啼螿碎殘燈何喜著花
紅花可愛情無賴獨眠遲短箋滿貯相思封題鈐小
印牢記秋螢信莫便道負心期人好在來應再那回端
不似當時

河傳

秋雨

薄暮微雨做秋聲紙瓦山牕獨明蘆花夾岸舟乍停曾
經瀟瀟和鴈聽 疎點漸稀檐外竹還蔌蔌靜覺涼生
屋記明朝約登高隔宵殘燈挑復挑

綺羅香

紅葉用玉田舊韻

叢菊籬荒茱萸泫冷漸老紅顏誰主派別丹黃不上青
楓圖譜任賽過二月花時渾難戀霜條霞縷向枝頭添
陣寒鴉自隨流水杳然去 去也去也何處曾博幾人
憐惜幾回題句醉面微酡有客暗嗟遲暮指隔岸賣酒
旗邊是昨歲登高舊路聽穿林風已蕭蕭可堪還夾雨

新鴈過粧樓

賦菊用玉田舊韻

留取瓦盆兼客土雅稱茅舍疎籬山人衣白老伴愛結

黃衣舊徑三三分好種新頭一一摘繁枝喜開時花如
人澹蟹比魚肥莫怨芳期搖蕩有南山到眼不負陶
詩結塢開屏晚景爭戀斜暉隣翁舊來好事記帽底滿
頭曾插歸歸來好問餐英幽味醉醒誰知

范景仁有菊塢菊屏二詩

江南好

虎丘送朱子容六丈入都癸亥二月

騎鶴吹笙六郎風格梅村向子猶新詞壇酒壘五十八
回春好在江山四壁茶烟畔髻縷飄銀驚初見壯心千
里擬向何人橫塘舟樣處桃鬟柳眼總是迷津把吳
都舊夢付與前因亂後渡江光景笑誰似衛玠傷神垂
綸手却遮西日還指洛陽塵

霜葉飛

再得淮江書知美珠別落人手余時將有南昌之役旅懷殊耿耿也

不來何意差池恨魚牋橫幅曾寄多緣銀漢澁微波誤
秋期容易還憶得別時情事烟條妨路船猶棧費多時
佇立纔小語回身行行莫忘飛翠 儂意正爾相憐半
年游跡直是沉吟爲此柳綿依舊化浮萍與飄零何異
倩一股菱花秋水殷勤好寄離人淚拚湔浦西風聽到
琵琶別添顛顛

望江南

朝發景德鎮夜抵饒州舟中卽事三首

江行好裊裊挂帆時一練澄波烟鎖住三竿紅日霧消
遲此景曉來宜

又

江行好歷歷亂帆時牛背日斜鴉獨立漁灣人去鷺雙

窺此景晚來宜

又

江行好寂寂卸帆時羣鴈驚人霜外起小船吹笛月中移此景夜來宜

四字令

阻風鄱陽湖

彭郎小姑康郎大姑更愁五老香爐限狂瀾一湖雲
汀樹枯沙汀草枯北風吹折黃蘆奈蕭蕭鴈呼

綺羅香

南州官舍風雨連朝履安叔索題詞藁

零雨西山斷雲南浦縹緲愁城誰築一卷新詞手寫烏
絲十幅喜穠婉漸近梅溪論清麗寧輸竹屋最苦是花
落江天此時相對却慵讀 幢幢孤館殘燭正蘋鱗蒼

翼望極遙目小立東風只唱舊時歌曲藁砧恨委浪萍
輕翠袖怨出山泉濁而今恁一句都無斷腸難再續

金縷曲

彭蠡舟中讀外舅陸先生與聲山姪鴈字唱和詩卷戲填此調

海外羣鴻戲寫遙天前行未斷後行還起排比八分人
字樣倒捲霞光作紙忽一折斜飛取勢變化隨宜成草
聖覺陣圖大有縱橫氣象外法畫中意 畫沙印雪依
稀似也強如紛紛鶩鴨挂名帖尾漸遠漸高看漸沒澹
入雲藍無際望不盡揚瀾左蠡有所思兮湘浦外悵魚

沈尺素遲難寄好為我傳牋地

法帖評鍾太傅書如飛鴻戲海宣和書譜王濛

論章草作人字法白香山詩却要斜飛取勢回王右軍
有筆陣圖蘇東坡詩有似飛鴻印雪泥右軍又有鶩羣

鴨頭九二帖雲

監箋見松陵集

邁陂塘

吳氏則屬題秋浦歸帆圖用李分虎韻
時由吳興學博去任

問先生采芹采芡何如歸采蕪去駱駝橋外樵風便好
著一枝柔艣挽不住看無恙歸帆穩挂西南路鏡奩初
鑄趁鷺頂飄絲鳧翁刷翠行到水窮處船頭轉一片
空濛烟雨吟續蘋洲笛譜風流六客今何在又作西湖
社主君記取笑道士磯邊未必無漁父為儂留語道放
鴨人歸桃花春漲來歲或尋汝

點絳脣

紅花埠道中

河北人家踏青也有紅裙女野花誰主多謝風擡舉

叵耐啼鶻苦勸人歸去歸何處濃烟疎雨遮斷江淮路

臺城路

京師送李分虎南歸兼懷令兄斯年武曾

秋聲獵獵修門外清笳亂砧齊起古堠參差離亭長短
獨客竟成歸計桑乾一騎漸淮菊催黃江楓變紫上了
吳船霜風吹淺太湖水登高恰當故里弟兄應悵望
別夢難理時斯年在長沙武曾在鳳陽西日東塵瘴南雪北此度勸
遊凡幾寄聲二李料隻影單棲未償初志莫忘去重來
酒人燕市裏

木蘭花慢

送曹升六舍人佐郡新安

插天青未了三十六翠芙蓉愛官閣鈴柳人家雞犬多
在雲中畫圖又呈變幻便橫看不與側看同烟氣潤添
修竹濤聲晴卷長松匆匆我昨遊蹤笑此去却輸公
正千里烽銷一州事簡諸縣年豐風流未妨佐郡問宦

情詩况那般濃擬踐黃山舊約籃輿筍屐相逢

齊天樂

寄祝魏青城憲副七十壽

傍城烟火環城水依然舊家喬木眷列東西巷分南北
中有涉園幽築花邊補屋正結構初成幅巾歸沐七十
平頭官情到此合知足 傳來雙鬢猶綠市朝回首處
都是碁局近社僧來署門客去誰奏鶴南飛曲翠娥持
燭待自琢新詞譜將絲竹散入春風蚤梅香撲撲

酹江月

京城中元

如弓沙月正秋輪乍滿映來粉堞冰瑣拍殘人影亂散
作六街涼蝶賣過荷花一番夜市又賣青荷葉碧雲萬
柄星星點點的 回憶昨歲今宵故人相喚並放西

湖榭水面樓臺天上下鏡裏倒窺紅頰經眼風光轉頭
情事鷗夢無多霎秋絲添鬢孤燈照影愁鐫

一萼紅

積雨有懷竹垞時移寓古藤書屋

翠糝糊想藤梢垂格老綠早涼初葉葉分風牀牀避漏
近日吟興何如問添了幾莖白髮又還問撚斷幾莖鬚
蠅拂甘瓜蟻浮苦酒作底歡娛 著得等身書就甚眼
中未見還有奇書夢隔前塵客來今雨好是深巷閒居
且莫賦田園歸去笑斯人何可此間無一咲回頭白鷗
浩蕩江湖

解珮令

聯句送趙秋谷歸益都

城頭畫鼓馬頭紅樹最無憀酒邊人去

朱彞尊

聽徧陽關

也未抵者番別苦魏一程風一程寒雨 斷橋橫浦淺

沙深塢翠灣環鄉山無數慎卸了朝衫換獨速莎衣醉

舞坤勝東華滿鞦韆塵土彝

浣溪沙 聯句題張遠墨梅

淡墨螺勻尺幅納坤五三六點冷香苞彝玉龍拖尾燕

分梢慎紙帳影浮斜月底彝畫屏春貼小山坳慎一

番花事又江郊坤

春風嫵娜 游絲同竹垞賦限蛇字

笑東君何意斷送芳華吹隋粉走歎沙向蜘蛛窠裏巧

粘密網縈成金縷展出縹車細欲無痕長能比髮牽惹

遊人眼界花安得天機纖素手纖將霧縠與冰紗 千

文晴空不礙日光斜
暎見閃閃輕留檐牙
無風綽被雲遮
瞥然搖曳又過隣家
一筆難抽來蹤去影
寸絲難縮
春蚓秋蛇無情有恨
任花面不北定誰憐
取飄蕩生涯

太白詩白髮三千丈陸探微
能一筆畫師宜官有游絲書

百字令

為真定梁相國壽

風流謝傅想當時原為蒼生而出人以為通公自介
四十年如一日闕補山龍姿同海鶴帝賚尊良弼太平有
象中書仍領樞密 猶記莊號雕橋壽槐重蔭了錦堂
琴瑟袞袞公卿皆後輩秩竿松齡纔七一桁朝衣滿床
牙笏慶繞芝蘭室梅邊開閣奉觴長近佳節

前調

竹垞屬題歸耕圖次卷中原韻

良田二頃只躬耕少箇南陽名士
悵望杏花烟雨候鄉
夢牽人何已纔着朝衫便思初服
前輩多如此先生歸
也買山計正難耳
趁好碌碡村邊桔槔園外長一支
春水還我綠蓑青篛笠重向溪南
小市十角吳牛千頭
楚橘蚤辦收身地笑陶元亮昨非
始覺今是

太平時

奉和

聖製立春

淑氣初回景色嘉
一天霞人間何物報春華
有梅花已覺冰池鱗甲動
浪淘沙滿城柳意待風斜
萬人家

醉太平

甲申元夕西苑觀燈
功院長賦

賜宴歸同揆愷

西山雪融西湖鏡融
一天明月清風慶時和歲豐
尊中酒紅懷中橘紅
醉歸街鼓鼕鼕報三霄露濃

邁陂塘

高江村宮詹屬題蔬香圖

展生綃天開圖畫恍然身在瑤圃宮羹禁鬪多嘗徧偏
愛蔬香繞筋江畔路擬挂却衣冠暫領田園趣斑鳩啼
午正土輦春酥疎畦小稜去一陣菜花雨筠籠淺把
送不勞地主自攜鴉嘴鋤去十年宰相非難事且與撥
灰煨芋煩致語料五畝池邊未是歸休處聊追白傳向
紫莧青菘黃芽綠甲博取醉吟句

百字令

樓敬思送盆菊賦謝

重陽纔過被霜風剪盡一庭秋綠門外白衣招不到臥
聽隣槽酒熟落葉聲乾殘陽影淡夢繞東籬菊此時貽
贈感君知我幽獨直為下溟田荒斜川路隔歸計貧

難卜華髮滿頭何處插辜負佳人空谷容土培根紙條

沁水聊洗塵埃目肯來同賞餐英正喜無肉敬思前寄余詩有何

妨食無肉之句

菩薩蠻錢蔗山給諫贈女兒香一奩賦謝

西塘才子東官令異香幾片遙攜贈喚着女兒名十分

憐惜生鷓鴣斑血結蘭氣熏奩出端合浣清泉忍教

凝紫烟以水洗之清香自發不待火熱也

疎影同魏水村賦寓庭芭蕉

新桐牆角愛碧茸茸下孤莖秀擢一片纔開一片旋抽

次第展將旬朔天生百竅玲瓏樹慣只做小庭葉幄儘

放教障日捎雲經多少雨淋漓濯漸入淒涼時候緊

西風攪得愁人夢覺幾度裁牋幾遍題詩饒半憐他脆
薄自從沒骨圖成後可還怕霜花剪却時禹尚基作寫生小幅好
護持宛轉柔心莫被玉纖偷剝

金縷曲

寓庭雜蒔草花有一種名秋牡丹者戲嘲之

小草當秋季向軒墀孤莖獨上晚花初試解道鼠姑顏色好一種偷他名字倩翠葉層層扶起碎翦繚綾攢縹
蒂與籬根霜菊差相似白菊經霜多變紫色那許並魏家紫 傾
城傾國談何易便同時翻階紅藥纔中作婢此外花曹
三百六誰譜入名園記幸落後少爭春意自揣弗如應
自遠尹和邢孰若相迴避入宮妬庶免爾

前調

盆池種藕有葉無花

為夢荷香蚤傷春分就隣乞藕埋盆作沼乍見田田浮
鏡面數點青錢圓小漸翠聳亭亭羽葆道是看花吾有
分去轉轆轤引水添清曉費心力計多少等閒長夏
多過了到秋來雲沉露冷向誰索笑老子胸無惆悵事
聽雨聽風也好只此子替伊煩惱直恐天寒羅袖薄與
芭蕉一例經霜倒剩清氣耐枯藁

醉太平

丙戌元宵

名赴暢春園西廠觀烟火

牆東玉虹橋東燭龍丹樓一朵雲紅是宵中旦中烟
濃霧濃凌空架空西山一帶朦朧隔千重萬重

長亭怨

咏揆院長家紅鸚鵡同孫松坪學士作

記故國隴雲深處千里依人華堂且住借取猩唇殷鮮

染出好毛羽雕籠太苦把三尺珊瑚架汝芍藥階前早
誦得主人佳句芳樹恁朝朝暮暮送盡桃花如雨枝
頭杜宇將血色啼痕相訴更休誇紅紫多知還應念綠
衣舊侶憑誰解銀絲重認丹山歸路

行香子

月下過佟陶菴學士湖上寓樓時隨
駕至杭

烟水鮮澄烟樹蒼騰上樓梯一二三層曲欄小檻是處
堪凭看日初沉雲初斂月初升有約頻仍許我重登
捲疎簾相對壺冰風流學士見也何曾是飲中仙詩中
將社中僧

減蘭

題湖舫丁亥秋作

十三樓壞十二橋邊朱舫在秋已蕭蕭老柳還誇十五

腰坐中年少昨日不來今乍到看我題詞漫道風流似昔時

臨江仙

西湖秋泛

記得樓亭

御舟名

春侍讌滿湖燈燭熏天一番光景換尊

前殘荷猶瀉雨疎柳已無蟬

望望西泠橋外去吟過

第六橋邊商聲輓上十三絃晚風吹不斷涼透鷺鷥肩

浪淘沙

錢塘觀潮

龕赭露雕尻對束江臯雲垂海立湧金鼇隔岸越山渾不見水比山高萬馬走單槽鱷徙龍迓當初誰賦廣陵濤強弩三千輸筆力直是人豪

洞仙歌

戊子正月望後竹垞表兄送余北行至南湖而別

一天冰雪過收燈時候長水橋南惜分手感登臚相送
直到衫青歌驪客檢點當前都有 兄言吾老矣後會
難期酌我重斟十分酒此意最殷勤臨發踟躕可敵得
石尤風否好借取深盃勸還酬也預筭中秋為先生壽

今年八月望後
先生入袞大慶

釵頭鳳

重渡揚子江

沙邊瀨花邊埭泊船剛與高樓對門開處垂楊樹多無
聊賴亂飄烟絮去去去 紅闌外青簾內依稀有箇箏
人在憑絃柱分明語風波如此勸公毋渡住住住

探春慢

上巳借揚晚研湯西崖周桐野沈礪房
萬柳堂禊飲

宰相橋坊

橋坊為益都
馬相國所題

太平風景那回被襖曾到能幾

多時再逢此會柳亦隨人漸老繞隄千萬樹
憇春晚偏如春蚤只添對酒新鶯未有轉枝黃鳥
閒數城南陰

伴剩楊湯周沈舊是同調水長蘆根烟開萍塊
此段年光最好從遣殘陽隨有初月舒眉遮照
醉尉相逢何妨

過申犯卯

馮異暮春醉中詩不須愁犯卯且乞醉過申

減蘭

賣花詞

吹花風起二十四番多到耳紫陌紅塵樓上新粧擔上
春朱門誰主舊日園丁今賣汝入市人看西子纔堪

博一錢

孟子注疏西施每入市人願見者先輸錢一文

步蟾宮

碧雲寺僧房見盆桂而作

誰移天上長生樹是八萬四千月戶一枝來自廣寒宮

猶似帶九秋風露 開時也有微香度奈冷蕊羅羅可
數小山招隱近來稀且讓與閒僧作主

桂枝香

辛卯十二月武英殿書局告竣停免丙直填此自嘲

老郎顏駟問霜雪盈顛久留何事寅入申歸刊韵聊充
外史村夫子輩能相笑笑日日亂書堆裏多年積笑不
知耗却幾囊官米 漫贏得燈花送喜似蝨魚蝕了神
仙兩字從此投閒免作蠅鑽故紙柯亭劉井迴翔入更

休論省官省吏還應自幸身慵職散稱優閒地

皎然詩外史刊

新韵蠅鑽故紙出傳燈錄南宋謂館職為省官周子充云省官不如省吏蓋嫌俸薄也見老學菴筆記白香山詩職散優閒地身慵老大時

水龍吟

次章質夫楊花舊韵

是誰細剪兜羅不期而至無端墜天生輕薄眯人望眼
惹人閒思繞徑鋪瓊當階滾雪重門難閉向酒旗影裏
茶烟榻畔一陣陣因風起却逐舞衫歌扇亂紛紛不
成行綴欲飛旋止將離又合乍團還碎最怕沾泥微嫌
罥網差宜點水任無情化作浮萍若箇洒楊家淚

桂殿秋

題桂菊圖為友人壽

高士宅列仙家秋光儘入畫圖諱移將月裏長生樹來
配霜前不落花生

柳梢青

從廟市買菊花二本白者先開黃者較遲半月戲嘲之

零露溥溥重陽過也菊蕊初團本來同譜根曾同種花
擬同看問伊開則誰先似兩姓詩人一般白在黃前

樂天樂地居易居難

唐末有舉子能為詩每通名刺云鄉貢進士黃居難字樂地欲比白

居易字樂天也

賀新涼

壬辰重陽前二日張日容招集城南陶然亭

驀過中秋後響西風萬梢蘆荻萬條楊柳惆悵東籬歸
未得帝里又將重九且趁伴來開笑口檢點尊前人如
故只病夫廢了持螯手時余左臂病風用其一且持酒
敝裘縫裂新寒透記年時隨鷹逐兔射飛烹走貧到今番無
菊看一醉徑煩良友笑樂事人生難又此會明年知誰
健問登高還在城南否吾老矣莽回首

前調

後二日蔣夔廣席上聽歌次前韵

風雨重陽後乍宵來微雲澹月高梧疎柳病與樂天相

伴住消遣十常八九更何必櫻桃樊口南魏北張餘音
在勝挨箏壓笛推琵琶當此際可無酒 就聾雙耳聲
聲透喜主人閉關投轄肯教賓走門外泥深行不得老
子狂呼小友聽換羽移商還又白日催年雞催曉問玲
瓏解唱吾歌否拚醉倒且濡首

好事近

自怡園聞鶯呈揆院長余長假將南歸
癸巳四月

杜宇勸人歸苦被鶯聲留住行到紫藤花外有垂楊千
樹 無心且與盡情啼切莫管春去知道雙甘斗酒是
明年何處

河傳

甲午春社作

雙燕相見又今朝來覓蓬茅舊巢酒邊一旗烟外招飄

飄綠楊紅板橋 昨夜社公新雨足
孟玦卜蠶麥家家 熟約比鄰去
酬神老人再逢得幾巡

漁家傲 題秋漁圖

蠓舍魚莊問有無 全家活計拍菰蒲
一曲烟波三四里 如畫裏殘荷折
葦蕭蕭意 村北村南酒可沽
秋來不欠水田租 昨夜夜涼貪熟睡
呼未起霜花濃壓船頭尾

西地錦 咏苔

三徑久荒松菊漸 平鋪蒼玉筍鞵新
縛蓑衣新買映上階 新綠
髮短何愁曲局愛 雨來如沐不教禽啄
不教

竹掃又忍教手觸

陸放翁詩新買蓑衣苔樣綠劉夢得

綠章予髮曲局薄言歸沐唐人詩
禽啄嫩苔又陰階竹掃苔

洞仙歌

秦駐山頂石上苔長三寸許土人呼為卷柏采歸養以清泉經宿莖葉展舒蒼翠欲滴因種之瓷盆冬來彌茂
本草所云長松當即此種也

海山絕頂有羣真來往斑駁落留石壇上任學拳稱栢

偃蹇稱松經幾劫三寸靈苗無恙小童殊解事隔宿

攜歸試汲清泉貯盆盎生意突然回扶起蒼顏勝九節

菖蒲拄杖果若是雲霞洞中仙幸勿與芝草琅玕爭長

點絳脣

乙未寒食鉛山道中遇雨

行過川程籃輿軋軋穿林去亂鴉啼處衣濕梨花雨

兒女青紅不踏城西路山無數丁丁樵斧知是誰家墓

瑞鶴仙

武彥山下看道院製茶

淺瀨紋如縠把輕篙撐入瀾滄渡九曲花宮繞林麓也

不耕瑶草不栽黃竹一聲秣鞠催隔塢人家布穀又誰
知茶竈開時三月石田蚤熟兩足旗槍初展院院提
筐摘將嫩綠濃蒸緩焙看火候纔經宿引微颺吹出白
雲深處香徧山南山北儘清流名船滿載筠籠何妨無宍

即肉字見
吳越春秋

沁園春

虎丘買水仙戲填一闋

根似鴟頭葉似蒜苗花名水仙問仙翁仙姆幾時留種
不移天上乃落人間洛浦凌波漢臯捐珮想像冰肌映
玉顏娉婷意勝眼中多少沅芷湘蘭山塘賣汝堪憐
只一本纔教值一錢向牆角堆堆籬根顆顆漸違物性
欲攬花權老我婆婆娑為渠愛惜貯以青磁沃以泉歸來

好賽渡江桃葉同上吳船

前調 咏老少年德尹以詩索賦

鴨脚輸黃鴉白輸紅將何比妍便粧成暮景未霜先豔
洗來朝氣得露尤鮮姹女司爐嬰兒躍冶幻出蓬頭灌
頂僊西風裏把丹砂一擲倒換衰年 笑他雙蝶翩翩
還認作花穠二月天看疎疎斜倚乍明人眼亭亭小立
恰並人肩涼雨簾櫳斷霞籬落好趁蛩聲雁影前秋非
晚似者般顏色我見猶憐

前調 蠟梅

不是陶家不是林家將金鑄顏恰避了青霜甘隨菊後
欺他豔雪愛占梅先融蠟為珠染梔成蒂萬蕊千頭顆

穎圓瞿曇面抱赤心一點誰鬥嬋娟
味無味處天然
宵便與蜂脾蜜作緣看野竹如煙聊同倚翠山茶似火
恥並爭妍酒泛新鵝塵消舊麴時有寒香到鼻邊銅餅
古把一枝斜插共餞殘年

東風第一枝

盆梅重放喜而有作

細剪櫻毛淨揩瓷斗蓓蕾重添繁蕊好風微漏春前暗
香偷攬臘尾畫中取意又豈在依山傍水逗紗窗一點
疎燈大有橫斜標致
便開也不抽燕觜便落也不粘
蝶翅苔痕綠上閒階是伊天然位置陳根客土幾曾占
種花隙地伴老夫炙硯呵冰寫入歲寒吟裏

一剪梅

瓶梅

短短寒梅剪剪茨記手栽時到手攀時花開先報白頭
知不取繁枝只揀疎枝竹几蘆簾相對宜可有霜欺
還怕冰欺膽瓶就火與頻移非定州瓷即汝州瓷

滿庭芳

半山舟中看桃花作

酒憶添顛辭成醜面風流時世梳粧多虧掩映倚竹倚
垂楊不費淺深斟酌紅無賴一意成狂村西路嫌他蜂
蝶抵死鬧斜陽舊家羅綺伴曹衣吳帶色色相當問
舊年崔護前度劉郎縱使遊蹤重到空悵望巷口門傍
煩說與道永和隄畔別有仙鄉

金縷曲

聞潤木弟隨車傷臂填此寄訊

臥穩東窗旭忽有人橋邊竹外叩門剝啄傳到城南隴

車信使我身如受縛嘆門戶阿奴碌碌黃髮為車

寶奈下堂頭步能傷足何況是脫輿輻新豐老典

身福料紛紛三公僕射非吾所欲鄉里兒童成項領春

勿爭馳競逐且三折把醫肱曲從此歸休真上策便白

駒瘦也宜空谷溪畔路想應熟新豐折臂翁見白香山詩折臂三公羊祜事見

晉書本傳騎車僕射王儉事見南史蔡廓傳

梅花引壬寅小除夜與德尹分賦

一方苔一梢梅殘雪初消花未開好風來好風來臘底

春前韶光方暗催明朝便是明年節明日立春勿論今夕

為何夕且啣盃且啣盃兄弟勸酬白頭知幾回

紅娘子咏雙頭桃實戲次沈房仲原韵